

MESYUARAT KEDUA, PENGGAL KEEMPAT
PARLIMEN KEEMPAT BELAS
2021

HARI KHAMIS : 18 NOVEMBER 2021

**JAWAPAN-JAWAPAN BAGI PERTANYAAN-PERTANYAAN JAWAB
LISAN YANG TIDAK DIJAWAB DI DALAM DEWAN
(SOALAN NO. 11, 14 HINGGA NO. 40)**

NOTA: [RUJUK PENYATA RASMI HARIAN (HANSARD)]

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

**DARIPADA : YB DATUK WILSON UGAK ANAK KUMBONG
[HULU RAJANG]**

TARIKH : 18 NOVEMBER 2021 (KHAMIS)

SOALAN

DATUK WILSON UGAK ANAK KUMBONG [HULU RAJANG] minta **MENTERI PELANCONGAN, SENI DAN BUDAYA** menyatakan apakah perancangan Kementerian bagi membangunkan lokasi Lusong Laku & Tasik Bakun sebagai pusat pelancongan. Adakah sebarang perancangan pembangunan infrastruktur akan dijalankan di 2 lokasi ini.

JAWAPAN

Tuan Yang di-Pertua,

1. Bersesuaian dengan kelebihan-kelebihan yang ada di negeri Sarawak, Kementerian Pelancongan, Seni dan Budaya (MOTAC) memberi tumpuan dan fokus kepada produk pelancongan yang berasaskan ekopelancongan di negeri itu serta menonjolkan kepelbagaian budaya dan adat warisan di Negeri Sarawak.
2. Bagi tujuan tersebut, Kementerian telah mengenal pasti 9 kluster ekopelancongan yang berpotensi untuk dibangunkan di Negeri Sarawak, yang mana salah satunya adalah Kluster Ekopelancongan Bintulu – Bakun – Belaga – Lusong Laku – Nanga Merit – Murum. Menerusi pembangunan kluster ekopelancongan ini, aktiviti ekopelancongan di kawasan sekitarnya akan turut dibangunkan secara holistik dan meliputi inisiatif *community based tourism* (CBT) dalam kluster tersebut.
3. Menyentuh mengenai Lusong Laku, saya rasa bertuah kerana dapat melihat dan merasai sendiri pengalaman di sana ketika membawa ahli pengurusan tertinggi serta pegawai-pegawai MOTAC dan agensi-agensi di bawah seliaannya ke kawasan ini pada bulan lalu. Ramai yang tidak mengetahui "*Hidden Gems*" yang terdapat di situ seperti Air Terjun Wong Pejik yang terletak di hulu Sungai Linau Lusong Laku yang berpotensi untuk dijadikan salah satu produk ekopelancongan yang menarik di negara kita. Selain itu, Lusong Laku juga merupakan syurga bagi pemancing ikan empurau yang terkenal di kawasan ini.
4. Hasil daripada lawatan kerja saya tersebut, kini Tourism Malaysia sedang meneliti potensi membangunkan pakej minat khas "*Nature - Adventure*" ke Lusong Laku. Memandangkan pada masa ini masih belum ada premis penginapan pelancongan yang sesuai berhampiran dengan kawasan air terjun tersebut, Tourism Malaysia sedang merangka kerjasama dengan persatuan pacuan empat roda (4x4) untuk mempromosikan pakej berkenaan kepada mereka. Ini kerana laluan

darat ke Lusong Laku hanya boleh di lalui dengan kenderaan pacuan empat roda sahaja.

5. Saya juga teruja dengan keindahan serta keunikan hasil kraftangan yang dihasilkan komuniti Penan di kawasan terbabit. Kehalusan hasil dan kualiti kraftangan berkenaan berpotensi diketengahkan ke peringkat nasional dan global kerana ia mempunyai nilai estetika yang tersendiri. Sebagai usaha MOTAC membantu seramai 50 orang komuniti kraf di Kampung Lusong Laku yang aktif dalam pengeluaran produk kraf, Kementerian ini telah meluluskan peruntukan berjumlah RM100,000 untuk menaik taraf rumah kraf tangan di Lusong Laku.

6. Rumah kraf tangan ini adalah untuk kegunaan komuniti kraf di Lusong Laku sebagai pusat pengeluaran dan pengumpulan produk kraf yang boleh dibeli oleh pelancong yang melawat ke kampung tersebut serta juga dibantu pemasarannya oleh Kraftangan Malaysia, iaitu sebuah lagi agensi di bawah seliaan MOTAC.

7. MOTAC akan meneruskan kerjasama erat dengan agensi negeri, terutamanya Kementerian Pelancongan, Kesenian dan Kebudayaan Negeri Sarawak (MTAC) dalam mempertimbangkan sebarang cadangan pembangunan pelancongan di Negeri ini termasuklah di kawasan Lusong Laku dan Tasik Bakun. Ini bagi memastikan produk pelancongan dapat dibangunkan dan dinaiktaraf dalam memberi manfaat kepada masyarakat tempatan.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPAT BELAS**

PERTANYAAN : JAWAB LISAN

DARIPADA : PUAN WONG SHU QI [KLUAG]

TARIKH : 18 NOVEMBER 2021 (KHAMIS)

SOALAN

minta **MENTERI KOMUNIKASI DAN MULTIMEDIA** menyatakan jangka masa untuk membentangkan Rang Undang-Undang Majlis Media Malaysia dan keadaan terkini berkenaan penubuhan Majlis Media Malaysia.

JAWAPAN

Tuan Yang Dipertua,

Untuk makluman Ahli Yang Berhormat, Kementerian Komunikasi dan Multimedia Malaysia (KKMM) telah menerima laporan daripada Jawatankuasa Pro-Tem Majlis Media Malaysia yang mengandungi cadangan penggubalan Rang Undang-Undang Majlis Media Malaysia serta pindaan dan pemansuhan beberapa perundangan sedia ada.

Antara perundangan yang telah dicadangkan untuk dipinda termasuklah Seksyen 499-502, Seksyen 505(b) dan (c) Kanun Keseksaan, Seksyen 114(a) Akta Keterangan 1950 dan Akta Finas 1981 agar sejajar dengan Perlembagaan Persekutuan. Selain itu, Jawatankuasa Pro-Tem Majlis Media Malaysia juga telah mencadangkan pemansuhan beberapa akta seperti Akta Mesin Cetak dan Penerbitan 1984, Akta Rahsia Rasmi 1972 dan Akta Hasutan 1948.

Sehubungan itu, Kementerian ini perlu mempertimbangkan secara terperinci cadangan-cadangan pemansuhan dan pindaan Akta-Akta berkaitan yang terletak di bawah bidang kuasa pelbagai Kementerian dan agensi. Justeru, perbincangan lanjut berhubung pindaan atau penggubalan undang-undang baharu bersama kementerian atau agensi lain yang berkaitan perlu diadakan terlebih dahulu sebelum Rang Undang-Undang yang berkaitan dapat dimuktamadkan dan dibentangkan di Parlimen.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS TAHUN 2021**

PERTANYAAN : LISAN

**DARIPADA : DATO' SRI HAJAH ROHANI BINTI
HAJI ABDUL KARIM [BATANG LUPAR]**

TARIKH : 18 NOVEMBER 2021 (KHAMIS)

SOALAN

DATO' SRI HAJAH ROHANI BINTI HAJI ABDUL KARIM [BATANG LUPAR] minta **MENTERI PERTANIAN DAN INDUSTRI MAKANAN** menyatakan apakah dapatan dan solusi yang dicapai menerusi Jawatankuasa Kabinet Mengenai Jaminan Makanan yang dipengerusikan Perdana Menteri yang telah ditubuhkan setahun yang lalu.

JAWAPAN

Tuan Yang Di Pertua,

Untuk makluman Ahli Yang Berhormat, Kementerian Pertanian dan Industri Makanan (MAFI) sentiasa peka dengan senario semasa sekuriti makanan negara, terutamanya dalam menangani kesan COVID-19 terhadap sistem makanan. Ini jelas menerusi penubuhan Jawatankuasa Kabinet Mengenai Dasar Sekuriti Makanan Negara atau FSICC yang dipengerusikan oleh YAB Perdana Menteri bagi merangka hala tuju sekuriti makanan negara yang lebih holistik dan mampan.

Semenjak penubuhan Jawatankuasa Kabinet ini pada 25 Mac 2020, pelbagai usaha telah dilaksanakan untuk merapatkan jurang yang dikenal pasti dalam sistem makanan negara, khususnya bagi memastikan kelangsungan bekalan makanan yang cukup, selamat, bernutrisi dan mampu beli secara berterusan kepada rakyat.

Sehingga kini, Jawatankuasa Kabinet telah membincangkan aspek-aspek yang berpotensi bagi memperkukuh sekuriti makanan negara, antaranya cadangan insentif untuk pengeluar makanan sihat dan berkhasiat, pemantauan dan penguatkuasaan pengimportan daging, mekanisme pemantauan bekalan dan harga bahan makanan khususnya bawang dan cili serta penubuhan Lembaga Ruminan Negara (LRN).

Pelaksanaan Program *Smart* Sawah Berskala Besar (SMART SBB) juga merupakan antara solusi yang dicapai menerusi platform ini untuk meningkatkan produktiviti industri padi dan beras negara. Program ini mensasarkan peningkatan purata hasil per hektar daripada 3.5 tan metrik kepada 7.0 tan metrik dalam tempoh Rancangan Malaysia Kedua Belas (RMKe-12) melalui pelbagai kaedah pelaksanaan seperti pertanian kontrak dan sewaan.

Selain itu, MAFI secara kolaborasi merentasi agensi dan kementerian telah membangunkan satu (1) pelan tindakan khusus iaitu Pelan Tindakan Dasar Sekuriti Makanan Negara (Pelan Tindakan DSMN) 2021-2025 bertujuan menterjemah inisiatif-inisiatif berteraskan

peningkatan daya tahan sistem makanan negara dengan mengambil kira isu dan cabaran di sepanjang rantai bekalan makanan bermula daripada input pertanian hingga ke sisa makanan. Saranan dan pandangan pelbagai pihak seperti pemain industri, ahli akademik serta badan bukan kerajaan (NGO) telah diambil kira dalam menyediakan pelan tindakan ini, termasuk saranan-saranan penambahbaikan yang dibangkitkan oleh *The Economist Intelligence Unit* (EIU) menerusi Laporan *Global Food Security Index* (GFSI) 2020.

Pelaksanaan pelan tindakan ini akan dipantau secara strategik menerusi empat (4) kluster atau jawatankuasa teknikal yang ditubuhkan merentasi agensi dan kementerian dengan mengoptimumkan platform sedia ada. Kluster-kluster ini juga bertanggungjawab dalam meneliti isu dan saranan berlandaskan dimensi sekuriti makanan iaitu ketersediaan (*availability*), akses (*accessibility*), penggunaan (*utilization*) serta kestabilan dan kemampanan (*stability and sustainability*) untuk pertimbangan jawatankuasa kabinet kelak.

Di samping itu, satu (1) kumpulan kerja atau Taskforce Data Sekuriti Makanan Negara telah diwujudkan bagi mengenal pasti sumber dokumen GFSI yang berpotensi menjadi rujukan dengan mengumpul data tersedia di kementerian dan agensi berdasarkan indikator GFSI.

Dalam hal ini, diyakini dengan usaha-usaha yang sedang dan bakal dilaksanakan akan menyumbang kepada usaha Kerajaan untuk merapatkan jurang dalam sistem makanan agar kekal utuh dalam mengharungi sebarang krisis.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

DARIPADA : DR. LEE BOON CHYE [GOPENG]

TARIKH : 18 NOVEMBER 2021 (KHAMIS)

SOALAN

DR. LEE BOON CHYE [GOPENG] minta **MENTERI TENAGA DAN SUMBER ASLI** menyatakan penggunaan tenaga mengikut sumber dan setakat manakah Kementerian memberi insentif untuk industri tenaga boleh diperbaharui (*renewable energy*).

JAWAPAN

Tuan Yang di-Pertua,

1. Untuk makluman Ahli Yang Berhormat, sehingga 30 Jun 2021, jumlah kapasiti terpasang dalam pembekalan elektrik negara berdasarkan pecahan sumber adalah seperti berikut:

- | | |
|--------------------------|------------------|
| (i) Gas | : 14,276MW (38%) |
| (ii) Arang Batu | : 12,994MW (35%) |
| (iii) MFO/Diesel | : 834MW (2%) |
| (iv) Tenaga Boleh Baharu | : 8,521MW (22%) |
| (v) Lain-lain | : 868MW (3%) |

2. Bagi menggalakkan pemaju tempatan untuk terus melaksanakan projek-projek TBB bagi menyokong agenda pembangunan lestari negara, Kerajaan telah menyediakan beberapa insentif seperti berikut:

- (i) *Green Investment Tax Allowance* (GITA) yang memberikan Elaun Cukai Pelaburan (ECP) sebanyak 100% ke atas perbelanjaan modal seperti pelaburan dan perolehan aset hijau yang layak;
- (ii) *Green Income Tax Exemption* (GITE) yang memberikan pengecualian cukai pendapatan (*income tax exemption*) ke atas pendapatan berkanun bagi aktiviti perkhidmatan hijau; dan
- (iii) Skim Pembiayaan Teknologi Hijau atau *Green Technology Financing Scheme* (GTFS) yang menawarkan rebat sebanyak 2% daripada kadar faedah pinjaman bank yang dikenakan untuk tujuh tahun pertama pelaksanaan projek, serta jaminan Kerajaan sebanyak 60% daripada jumlah pinjaman yang diluluskan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

**DARIPADA : DATO' HAJI MOHD FASIAH BIN HAJI MOHD
FAKEH [SABAK BERNAM]**

TARIKH : 18 NOVEMBER 2021 (KHAMIS)

SOALAN

Minta **MENTERI PENGAJIAN TINGGI** menyatakan setakat manakah Pelan Strategik Kebolehpasaran Graduan Institut Pengajian Tinggi (IPT) mampu meningkatkan lagi kebolehpasaran graduan semasa dan pasca pandemik COVID-19 ini serta nyatakan setakat manakah penglibatan industri dalam merangka dan menyediakan bidang latihan internship yang diberikan keutamaan ketika ini untuk memenuhi keperluan industri.

JAWAPAN

Tan Sri Yang di-Pertua,

Pelan Strategik Kebolehpasaran Graduan 2021–2025 merupakan dokumen strategik yang berperanan membantu dan memberikan panduan kepada IPT untuk meningkatkan kadar kebolehpasaran graduan dalam tempoh pandemik dan pasca pandemik COVID-19. Pelan ini menumpukan kepada pelaksanaan empat strategi teras bagi meningkatkan kadar kebolehpasaran graduan iaitu:

- (i) **Strategi Pengukuhan Kecemerlangan Bakat;**
Memperkuhkan bakat pelajar dengan inisiatif peningkatan kemahiran berbahasa Inggeris serta kemahiran abad ke-21 seperti automasi, kecerdasan buatan (AI) dan teknologi berkaitan 4IR. Graduan yang menguasai kemahiran-kemahiran tersebut mempunyai potensi

besar untuk merebut peluang pekerjaan baharu dalam pasaran pekerjaan.

(ii) Strategi Peluasan kerjaya pelajar;

Usaha untuk memperkemaskan pelaksanaan padanan permintaan dan penawaran pekerjaan menggunakan teknologi terkini dan data raya ditekankan melalui strategi ini. Antara inisiatif yang digariskan adalah pembangunan modul *Jobmatching@GReAT* yang secara automatik dapat memadankan data graduan belum bekerja dengan kriteria keperluan pekerja yang dikunci masuk oleh industri. Modul ini memudahkan pihak industri mencari bakat yang sesuai untuk mengisi kekosongan perjawatan selain memberi penekanan kepada pemerkasaan fungsi dan peranan pusat kerjaya sebagai pusat sehati bagi pembangunan dan perkembangan kerjaya pelajar. Selain itu, profiling kerjaya pelajar turut dilaksanakan secara komprehensif melalui TalentCorp NEXT- *Nurturing Expert Talent*, serta penggunaan portal MYFutureJobs, PERKESO bagi menghubungkan pelajar kepada industri yang berdaftar dengan PERKESO.

(iii) Strategi Pemantapan pengajaran dan pembelajaran (PdP);

Aktiviti PdP diperkukuhkan melalui dua inisiatif iaitu memastikan kandungan program-program akademik di IPT dapat memenuhi keperluan industri 4.0 dan kompetensi tenaga pengajar di IPT dipertingkat sejajar dengan perkembangan semasa. Dalam konteks ini, program-program akademik sentiasa disemak dan dikaji semula secara berkala untuk memastikan kandungannya sentiasa terkini, relevan dan bersifat *Future Ready Curriculum*. Selain itu, kemahiran tenaga pengajar sentiasa ditingkatkan melalui program-program sangkutan di industri dan perkongsian kepakaran oleh tokoh-tokoh industri melalui program seperti CEO@Faculty dan *Academia Talent Exchange Programme* (AlxCHANGE).

(iv) Strategi Pemerkasaan hubungan industri.

Melalui strategi ini kerjasama rapat IPT dan Industri diperkukuhkan melalui pelbagai program dan aktiviti, bermula daripada pembentukan program pengajian, kandungan modul, latihan

industri sehingga pelajar menamatkan pengajian dan menerima tawaran pekerjaan daripada industri. Kerjasama erat ini juga dapat mengurangkan ketidaksepadanan antara kemahiran yang dimiliki graduan dengan keperluan semasa pihak industri. Kerjaya pelajar yang dirancang awal dengan penglibatan tinggi pihak industri dapat membantu mengembangkan bakat; menyediakan dan mempersiapkan mereka dengan keperluan pasaran pekerjaan masa hadapan.

Keterlibatan pihak industri khususnya dalam menyediakan penempatan kepada pelajar bagi tujuan Latihan Industri adalah penting dalam memastikan pelajar dapat menamatkan pengajian mengikut tempoh masa yang ditetapkan. Libat urus ini dilaksanakan melalui struktur Employability Advisory Council (EAC) yang dianggotai oleh wakil-wakil sumber manusia mengikut sektor industri secara berkala.

Sebarang isu berkaitan Latihan Industri seperti pembayaran elaun, perlindungan insuran, jumlah penempatan, kebajikan pelajar semasa latihan dan sebagainya dibincangkan secara terperinci dengan pihak industri melalui platform ini. Selain itu, kementerian juga melaksanakan libat urus secara terus dengan syarikat-syarikat terkemuka untuk membincangkan mengenai penempatan pelajar bagi tujuan latihan industri. Antaranya adalah dengan syarikat Intel melalui program MOHE and Intel Elite Internship dan Huawei Technologies Co. Ltd melalui program Huawei Seed for The Future.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KE-EMPAT BELAS**

PERTANYAAN : JAWAB LISAN

**DARIPADA : YB TUAN CHON KON YEOW
(TANJUNG)**

TARIKH : 18 NOVEMBER 2021 (KHAMIS)

SOALAN

TUAN CHON KON YEOW [TANJUNG] minta **MENTERI PENGANGKUTAN** menyatakan senarai kos projek-projek Mass Rapid Transit (MRT) 1 dan 2, Light Rail Transit (LRT) 1 dan 2, Pan Borneo Highway, East Coast Rail Link dan Lebuhraya Pantai Barat. Perincikan juga tempoh pelaksanaan projek-projek berkenaan.

JAWAPAN

Tuan Yang di-Pertua,

Projek *Klang Valley Mass Rapid Transit* (KVMRT) merupakan satu projek rangkaian rel bandar di Lembah Klang yang merangkumi tiga jajaran; MRT1, MRT2 dan MRT3 (Laluan Lingkaran). Projek MRT1 ataupun dikenali dengan nama MRT Laluan Kajang telah dimulakan pada 8 Julai 2011 dan telah siap serta memulakan operasinya pada Julai 2017. Kos pembinaan projek MRT1 ini adalah sebanyak RM 21 bilion, dan laluan ini menghubungkan Sungai Buloh – Kajang dengan jajaran sepanjang 51 km dan mempunyai 31 buah stesen.

Projek MRT2 ataupun MRT Laluan Putrajaya yang menghubungkan Sungai Buloh – Serdang - Putrajaya pula adalah sejauh 52.2 km dan terdiri daripada 33 buah stesen. Projek ini telah dimulakan pada Oktober 2015 dan dijangka siap sepenuhnya menjelang Januari 2023. Kos pembinaan projek MRT2 ini adalah sebanyak RM30.53 bilion. Sehingga September 2021, projek MRT2 telah mencatatkan kemajuan keseluruhan sebanyak 94.5%.

Projek LRT3 ataupun LRT Laluan Shah Alam adalah merupakan laluan ketiga dalam sistem LRT Lembah Klang. Laluan ini akan menghubungkan Bandar Utama di Damansara ke Johan Setia di Klang. LRT Laluan Shah Alam ini adalah sejauh 37.8 km dan terdiri daripada 20 buah stesen. Projek ini bermula pada November 2015 dan dijangka akan siap sepenuhnya menjelang Februari 2024.

Kos pembangunan projek LRT Laluan Shah Alam ini adalah sebanyak RM16.63 bilion. Sehingga 30 September 2021, projek LRT3 telah mencatatkan kemajuan keseluruhan sebanyak 61.27%, dan kini tertumpu kepada kerja-kerja pembinaan struktur sokongan landasan, terowong, bangunan stesen, depoh keretapi, serta landasan rel untuk menerima kenderaan transit aliran ringan (LRT) pertama pada bulan November 2021.

Projek Laluan Rel Pantai Timur (ECRL) sepanjang 665 km adalah merupakan projek rel yang akan menghubungkan negeri-negeri di Pantai Timur dengan Pantai Barat Semenanjung Malaysia. Kos terkini ECRL adalah RM50.27 bilion berbanding dengan kos asal pada tahun 2017 yang berjumlah RM66.78 billion (termasuk Serendah Bypass). Pembinaan projek ECRL ini dibahagikan kepada tiga (3) seksyen iaitu Seksyen A dari Kota Bharu ke Dungun, Seksyen B dari Dungun ke Temerloh dan Seksyen C dari Temerloh ke Pelabuhan Klang. Sehingga 31 Oktober 2021, pembinaan keseluruhan projek ini telah mencapai kemajuan sebanyak 25.09% berbanding jadual sebanyak 27.55%.

Bagi Seksyen A iaitu dari Kota Bharu ke Dungun, skim keretapi telah diluluskan pada 14 Mei 2020 merangkumi pembinaan enam buah stesen iaitu Kota Bharu, Pasir Putih, Jerteh, Bandar Permaisuri, Kuala Terengganu dan Dungun. Kelulusan ini adalah bertepatan dengan program kerja penyediaan tapak yang telah dilaksanakan bermula pertengahan tahun 2020. Sehingga bulan September 2021, kemajuan kerja fizikal telah mencapai 12.79%.

Kerja-kerja fizikal juga sedang giat dilaksanakan di Seksyen B, iaitu jajaran dari Dungun ke Temerloh. Sejak disambung semula pada Julai 2019, kemajuan kerja fizikal di seksyen ini telah mencapai 31.47% merangkumi kerja-kerja tanah dan pembinaan terowong di Dungun, Paka dan Kuantan. Kerja-kerja bagi pembinaan terowong di Gambang, Sri Jaya, Gedung Siam dan Paya Pasir juga sedang dijalankan dengan aktif.

Bagi Seksyen C iaitu dari Temerloh ke Pelabuhan Klang, Kerajaan telah memutuskan jajaran terbaik bagi memastikan projek ECRL memberi impak ekonomi yang maksima apabila disiapkan kelak. Jajaran yang terbaik dan memberi impak maksima kepada rakyat adalah seperti yang diumumkan pada 5 April 2021. Oleh yang demikian, kerja-kerja bagi Seksyen C ini telah dibahagikan kepada Seksyen C1 dari Temerloh ke ITT Gombak dan Seksyen C2 dari Gombak ke Pelabuhan Klang melalui Serendah. Dalam hal ini, adalah penting projek ECRL dipastikan tersambung secara strategik dengan jaringan logistik rel kebangsaan. Kelebihan logistik ini akan dicapai tanpa mengurangkan kualiti perkhidmatan penumpang, sekaligus menjadikan ECRL sebagai

pemangkin ekonomi dan pekerjaan bagi kawasan di sepanjang jajarannya.

Pada masa ini, Kementerian Pengangkutan menjangkakan tarikh penyiapan bagi Seksyen A dari Kota Bharu ke Dungun dan Seksyen B dari Dungun ke Temerloh masih kekal seperti yang dijadualkan iaitu pada 31 Disember 2026. Walau bagaimanapun, penyiapan bagi Seksyen C dari Temerloh ke Pelabuhan Klang dijangkakan akan mengalami kelewatan selama 12 bulan iaitu pada 31 Disember 2027.

Seperti yang kita semua sedia maklum, penularan wabak Covid-19 yang melanda dunia pada ketika ini telah memberi kesan kepada semua sektor dan industri termasuklah sektor pembinaan infra atau projek-projek rel ini, dan sedikit-sebanyak telah menjejaskan kemajuan projek tersebut. Namun begitu, Kementerian Pengangkutan akan terus memantau pelaksanaan projek-projek rel ini bagi memastikan projek-projek tersebut dapat disiapkan mengikut perancangan dan mematuhi piawaian-piawaian yang telah ditetapkan serta selamat digunakan.

Bagi projek Lebuh raya Pan Borneo (LPB) dan Lebuh raya Pantai Barat adalah di bawah perhatian Kementerian Kerja Raya (KKR). Lebuh raya Pan Borneo (LPB) telah mula dibina pada 7 Oktober 2012 dan dijangka siap sepenuhnya pada 10 Oktober 2024 bagi keseluruhan Fasa 1 LPB Sabah dan Sarawak. Kos keseluruhan pembinaan Lebuh raya Pan Borneo adalah mencecah RM 23.46 bilion. Bagi Lebuh raya Pantai Barat, jangkaan projek lebuh raya ini siap sepenuhnya adalah pada Jun 2024 dengan kos pembinaan keseluruhan mencecah RM 5.044 billion.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

DARIPADA : TUAN CHE ALIAS BIN HAMID (KEMAMAN)

TARIKH : 18 NOVEMBER 2021 (KHAMIS)

SOALAN

TUAN CHE ALIAS BIN HAMID minta **MENTERI KANAN PENDIDIKAN** menyatakan sejauh mana Kementerian mengambil kira faktor bebanan tugas guru dalam merangka pelan sesi persekolahan secara penggiliran.

JAWAPAN

Tuan Yang di-Pertua,

Kementerian Pendidikan Malaysia (KPM) sentiasa cakna dan peka dalam memastikan murid mendapat pendidikan yang terbaik dalam apa jua keadaan khususnya pembelajaran murid yang terkesan akibat pandemik COVID-19. Menerusi pelan komprehensif pengoperasian semula sekolah secara bersemuka, KPM melaksanakan sistem penggiliran murid hadir ke sekolah mengikut minggu. Langkah ini diambil bagi mengurangkan kesesakan murid di dalam kelas dengan penjarakan fizikal yang baik. Kaedah penggiliran ini diguna pakai untuk semua kelas kecuali:

- i. Murid Bekeperluan Khas di Sekolah Kebangsaan Pendidikan Khas (SKPK)/ Sekolah Menengah Kebangsaan Pendidikan Khas (SMKPK) / Sekolah Menengah Pendidikan Khas Vokasional (SMPKV) dan Program Pendidikan Khas Intergrasi (PPKI);
- ii. murid di Tingkatan 5 di sekolah harian (apabila sekolah mencapai 90 peratus dan lebih kadar vaksinasi);
- iii. murid di Tingkatan 6 Semester 2 dan International Baccalaureate Diploma (IBD) Tahun 2;
- iv. murid di sekolah asrama sepenuhnya;
- v. murid kelas peperiksaan antarabangsa;
- vi. murid prasekolah/tadika swasta/pusat perkembangan minda (4-6 tahun); dan
- vii. murid di Sekolah Kurang Murid (kurang 150 murid).

Dalam merangka pelan ini, KPM turut mengambil kira faktor bebanan tugas guru. Justeru, guru hanya melaksana sesi pengajaran dan pembelajaran (PdP) kepada giliran kumpulan murid yang hadir secara bersemuka ke sekolah. PdP bersemuka di sekolah dilaksanakan mengikut jadual waktu yang ditetapkan.

Bagi giliran kumpulan murid yang berada di rumah, mereka mengikuti sesi pengajaran dan pembelajaran (PdPR) secara sendiri. Guru akan menjelaskan tentang aktiviti, latihan atau tugas yang perlu dilaksanakan berdasarkan topik yang akan dipelajari sebelum giliran sesi PdPR secara sendiri bermula. Di samping itu, guru akan turut memberi sumber rujukan yang boleh digunakan oleh murid semasa pembelajaran di rumah. Ini membolehkan murid mengikuti aktiviti pembelajaran melalui TV Pendidikan, rakaman video, pelantar DELIMa serta SumberKU. Guru juga boleh memberi tugas untuk murid membuat buku skrap, projek mudah, aktiviti amali mudah atau membaca buku, modul, buku teks dan nota. Tugas ini akan disemak oleh guru apabila murid kembali ke sekolah pada minggu berikut.

Bagi memastikan pelaksanaan pengoperasian PdP secara penggiliran berjalan dengan baik, KPM telah menyediakan Manual Pengoperasian Pengajaran dan Pembelajaran Secara Penggiliran sebagai panduan kepada guru tentang pelaksanaannya. Guru boleh merujuk kepada manual tersebut untuk memudahkan pelaksanaan PdP mereka dalam tempoh ini.

KPM yakin guru komited dalam memastikan pengoperasian sekolah secara bersemuka berjalan dengan lancar dan selamat supaya PdP dapat diikuti oleh murid dan dilaksanakan oleh guru dengan berkesan.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KE-14**

PERTANYAAN : LISAN
DARIPADA : TUAN CHONG CHIENG JEN
[STAMPIN]
TARIKH : 18 NOVEMBER 2021 (KHAMIS)

SOALAN

TUAN CHONG CHIENG JEN [STAMPIN] minta **MENTERI KEWANGAN** menyatakan berapa jumlah peminjam yang akan dimanfaatkan di bawah program moratorium tanpa faedah yang disebutkan dalam Memorandum Persefahaman Transformasi dan Kestabilan Politik. Apakah jumlah yang ditangguhkan pembayaran dalam masa 3 bulan ini dan apakah jumlah faedah yang telah dibatalkan dalam tempoh masa ini.

JAWAPAN

Tan Sri Yang di-Pertua,

1. Pada bulan Mac 2020, lebih 7.7 juta peminjam individu dan 243,000 perusahaan kecil dan sederhana telah menerima moratorium pertama selama 6 bulan. Sejak itu, bank-bank terus memberikan moratorium dan bantuan bayaran balik pinjaman dalam pelbagai bentuk kepada peminjam yang memerlukannya selepas moratorium pertama berakhir pada bulan September 2020.
2. Susulan pelaksanaan semula perintah kawalan pergerakan yang diperketatkan bermula bulan Jun 2021, sekitar 2.8 juta peminjam telah menerima bantuan bayaran balik pinjaman dalam bentuk moratorium atau pengurangan ansuran pinjaman setakat 15 Oktober 2021.

3. Bagi membantu peminjam menguruskan hutang mereka secara menyeluruh untuk jangka masa yang lebih panjang, industri perbankan telah mengumumkan Program Pengurusan dan Ketahanan Kewangan (atau URUS) pada 14 Oktober 2021 bagi golongan kumpulan pendapatan 50% terbawah (atau B50), iaitu isi rumah berpendapatan sehingga 5,880 ringgit sebulan yang masih terkesan akibat pandemik COVID-19.

4. Menerusi program ini, peminjam akan mendapatkan pelan kewangan peribadi daripada Agensi Kaunseling dan Pengurusan Kewangan (atau AKPK) yang mengambil kira semua pendapatan peminjam yang mampu diperuntukkan untuk membayar segala hutang peminjam di semua institusi kewangan, selepas mengambil kira segala keperluan hidup. Peminjam juga akan mendapat pengecualian faedah selama tiga bulan dan bantuan bayaran balik pinjaman bagi tempoh sehingga 24 bulan dalam bentuk penangguhan bayaran dan pengurangan bayaran ansuran mengikut kemampuan masing-masing. Program yang menyeluruh daripada AKPK ini bukan sahaja membantu peminjam membuat bayaran balik pinjaman mengikut kemampuan mereka, malah peminjam juga mendapat manfaat melalui nasihat pengurusan kewangan yang boleh meningkatkan daya tahan kewangan mereka dalam jangka masa panjang.

Tan Sri Yang di-Pertua,

5. Berdasarkan unjuran awal bagi program URUS, sekitar 1 juta peminjam B50 dijangka menerima bantuan yang akan melibatkan nilai faedah yang dikecualikan sekitar 1 bilion ringgit. Namun demikian, berdasarkan persekitaran ekonomi yang semakin pulih, wujud kemungkinan jumlah pemohon adalah lebih kecil daripada yang dijangkakan.

6. Berkenaan jumlah yang ditangguhkan pembayaran dalam masa 3 bulan dan jumlah faedah yang telah dibatalkan, adalah sukar untuk menganggar jumlah pembayaran tertangguh kerana bantuan bayaran balik pinjaman akan disesuaikan mengikut kemampuan peminjam.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

**DARIPADA : TUAN YUSUF BIN ABD. WAHAB
(TANJONG MANIS)**

TARIKH : 18 NOVEMBER 2021 (KHAMIS)

SOALAN

TUAN YUSUF BIN ABD. WAHAB minta **MENTERI KANAN PENDIDIKAN** menyatakan apakah status pemberian komputer atau peranti kepada murid-murid sekolah di kawasan Parlimen Tanjong Manis. Berapa jumlah yang sudah diserahkan dan yang akan diserahkan pada tahun hadapan.

JAWAPAN

Tuan Yang di-Pertua,

Inisiatif Tabung CERDIK adalah satu inisiatif pemberian peranti digital lengkap dengan pelan data kepada 150,000 orang murid B40 yang dilaksanakan oleh Yayasan Hasanah, sebuah yayasan di bawah Khazanah Nasional. CERDIK merupakan satu inisiatif tanggung jawab sosial korporat (CSR) oleh syarikat berkaitan kerajaan (GLC) dan syarikat pelaburan berkaitan kerajaan (GLIC) bertujuan menyediakan peranti digital kepada murid B40 yang dikenal pasti. Yayasan Hasanah bertanggungjawab menguruskan sumbangan peranti digital termasuk pelan data daripada GLC dan GLIC serta menyelaras penghantaran peranti digital ke pejabat pendidikan daerah (PPD). Manakala, Kementerian Pendidikan Malaysia (KPM) bertanggungjawab untuk mengenal pasti murid B40 yang layak menerima peranti digital mengikut kriteria yang ditetapkan dan seterusnya menguruskan agihan peranti digital tersebut.

Untuk makluman Ahli Yang Berhormat, kesemua 150,000 peranti digital inisiatif Tabung CERDIK telah selesai diagihkan pada 29 Oktober 2021. Daripada jumlah tersebut sebanyak 429 unit peranti telah selesai diagihkan kepada lima (5) sekolah di kawasan Parlimen Tanjong Manis.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPAT BELAS TAHUN 2021**

PERTANYAAN : LISAN

**DARIPADA : TUAN SIVAKUMAR VARATHARAJU NAIDU
[BATU GAJAH]**

TARIKH : 18 NOVEMBER 2021 (KHAMIS)

SOALAN

TUAN SIVAKUMAR VARATHARAJU NAIDU [BATU GAJAH] minta **MENTERI PERTANIAN DAN INDUSTRI MAKANAN** menyatakan usaha-usaha Kementerian menggiatkan pertanian pintar mengikut sub-sektor pertanian dalam jangka pendek dan jangka panjang. Berapa jumlah peruntukan yang disediakan bagi tujuan penyelidikan dan pembangunan (R & D) dan pelaksanaan pertanian pintar sepanjang tempoh Rancangan Malaysia Kedua Belas.

JAWAPAN

Tuan Yang Di Pertua,

Untuk makluman Ahli Yang Berhormat, Kementerian Pertanian dan Industri Makanan (MAFI) telah memperkenalkan Dasar Agromakanan Negara 2021-2030 (DAN 2.0) yang menggariskan strategi jangka panjang sektor agromakanan untuk tempoh 10 tahun dan memberi tumpuan kepada pemodenan sektor agromakanan menerusi Teras 1: Mendukung Pemodenan dan Pertanian Pintar. Pelaksanaan dasar ini juga disokong oleh Rancangan Malaysia Kedua Belas (RMKe-12) yang mengenal pasti pertanian pintar sebagai aktiviti

strategik dan berimpak tinggi yang dapat menjana semula pertumbuhan ekonomi negara.

Bagi sektor tanaman, Jabatan Pertanian (DOA) telah diluluskan peruntukan sebanyak RM232 juta di bawah RMKe-12 melibatkan tujuh projek bagi menaiktaraf sistem pengairan sedia ada kepada pengairan pintar menggunakan *Internet of Things* (IoT), pembangunan pertanian dalam persekitaran terkawal serta perolehan jentera, mesin dan aplikasi pertanian pintar. Di bawah RMKe-12 juga, Institut Penyelidikan dan Kemajuan Pertanian Malaysia (MARDI) telah dipertanggungjawabkan untuk melaksanakan penyelidikan dan pembangunan (R&D) dalam bidang agromakanan dengan peruntukan sebanyak RM3.58 juta pada tahun 2021. Jumlah ini meliputi pembangunan sistem pengeluaran pintar mengikut peringkat proses pengeluaran tanaman seperti penanaman, penjagaan tanaman dan penuaian serta sistem mekanisasi dan automasi untuk peningkatan kecekapan tenaga dan operasi pengeluaran dalam struktur persekitaran terkawal.

Bagi sektor ternakan pula, MAFI menerusi Jabatan Perkhidmatan Veterinar (DVS) akan memperkasa industri ruminan negara melalui Pelan Strategik Pembangunan Industri Pedaging Negara (*Bif Plan*) 2021-2025 dan Pelan Strategik Pembangunan Industri Tenusu Negara (*Dairy Plan*) 2021-2025. Pelan strategi ini melibatkan aplikasi bioteknologi pembiakan seperti peranakan beradas dan aplikasi teknologi 4IR seperti *Real-Time Artificial Intelligence Assisted Cattle Management System* dalam penternakan ruminan dan tenusu. Bagi inisiatif jangka panjang, tumpuan diberikan kepada pemodenan dalam sektor penternakan seperti amalan penternakan secara reban tertutup atau *closed house system* bagi ternakan unggas yang dapat meningkatkan produktiviti ternakan serta lebih mesra alam. Di samping itu, sistem blok rantai atau *blockchain* juga diperkenalkan sebagai salah satu usaha Kerajaan untuk mengukuhkan sistem daya jejak sarang burung walit (SBW). Selain itu, sebanyak RM2.3 juta telah diperuntukkan bagi menjalankan R&D berkenaan pengesanan penyakit ternakan dan penghasilan vaksin di bawah RMKe-12.

SOALAN NO : 22

Bagi sektor perikanan, Jabatan Perikanan Malaysia (DOF) memberi tumpuan kepada industri ternakan udang dan ikan sangkar yang berskala komersial yang menggunakan teknologi seperti *auto feeder*, penggunaan *bucket rail* untuk mengangkut hasil, *automatic sensor* untuk menguji suhu air dan perubahan angin, *smart phone alert system* untuk mengesan tahap oksigen dalam air serta penggunaan dron bagi tujuan pemantauan di kawasan ladang. Di bawah RMKe-12, sebanyak RM20 juta telah diperuntukkan dari segi R&D bagi melaksanakan penyelidikan untuk meningkatkan hasil pengeluaran sektor akuakultur.

Di samping itu, selaku agensi peneraju untuk pembangunan industri berasaskan bio di bawah MAFI, Malaysian Bioeconomy Development Corporation (Bioeconomy Corporation) juga membantu menggiatkan aktiviti pertanian pintar. Pada tahun 2021, Bioeconomy Corporation telah diberi peruntukan sebanyak RM500,000 untuk membangunkan projek pembuktian pertanian bandar secara pintar dalam bangunan.

Di peringkat kumpulan sasar, Lembaga Pertubuhan Peladang (LPP) sedang melaksanakan inisiatif Ladang e-Satelit dengan peruntukan sebanyak RM10 juta. Projek agromakanan menggunakan sistem IoT ini berbentuk geran padanan dengan nisbah 70:30 dan had maksimum daripada Kerajaan berjumlah RM30,000 bagi setiap permohonan. Kemudahan kepada pertubuhan peladang dan usahawan peladang ini melibatkan penggunaan aplikasi teknologi terkini seperti sistem aplikasi pertanian pintar, perisian dan peralatan teknologi IoT dan dron serta pembangunan infrastruktur seperti jalan ladang.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

DARIPADA : DATUK DR. HASAN BIN BAHROM (TAMPIN)

TARIKH : 18 NOVEMBER 2021 (KHAMIS)

SOALAN

DATUK DR. HASAN BIN BAHROM minta **MENTERI KANAN PENDIDIKAN** menyatakan apakah terdapat kajian menyeluruh terhadap masalah psikososial golongan pelajar. Apakah hasil dapatan kajian dan bagaimana Kementerian mengatasi masalah tersebut.

JAWAPAN

Tuan Yang di-Pertua,

Kementerian Pendidikan Malaysia (KPM) sentiasa prihatin dan peka terhadap psikososial serta kebajikan murid. KPM dengan kerjasama Kementerian Kesihatan Malaysia (KKM) telah melaksanakan Program Minda Sihat Di Sekolah Dalam Kebiasaan Baharu bagi memperkasa psikososial, menyokong kesejahteraan sosioemosi murid dan melaksanakan intervensi dalam menguruskan emosi mereka dengan baik semasa tempoh pandemik COVID-19. Melalui program ini, Saringan Minda Sihat dilaksanakan sebagai pengesanan awal untuk mengenal pasti murid yang mempunyai isu berkaitan emosi.

Untuk makluman Ahli Yang Berhormat, seramai 818,430 orang murid Tahun Lima dan Tahun Enam di sekolah rendah telah mengambil bahagian dalam saringan ini bagi tempoh Jun hingga Ogos 2021. Berdasarkan dapatan saringan tersebut, terdapat 87.45 peratus murid dikategorikan tidak berisiko iaitu tidak menunjukkan perasaan sedih berpanjangan, murung dan kurang minat apabila melakukan kerja-kerja lebih. Manakala 12.55 peratus murid dikategorikan sebagai berisiko dengan menunjukkan perasaan sedih berpanjangan, murung dan kurang minat melakukan kerja-kerja lebih.

Murid sekolah rendah yang dikenal pasti berisiko diberikan intervensi khusus melalui aktiviti teknik relaksasi, *mindfulness*, sesi bimbingan dan kaunseling serta konsultasi ibu bapa/ penjaga bagi meningkatkan kemahiran gaya daya (coping skill) tindak murid berkenaan. Ini kerana murid didapati kurang kemahiran mengurus emosi dengan baik apabila menghadapi situasi mencabar. Manakala murid yang dikenal pasti berada dalam kategori tidak berisiko diberikan intervensi umum seperti panduan amalan gaya hidup sihat.

Untuk makluman Ahli Yang Berhormat, murid sekolah menengah bermula daripada kelas peralihan sehingga Tingkatan Enam berjumlah 1,737,755 orang juga telah mengambil bahagian dalam saringan ini. Isu

psikososial yang dikenal pasti berdasarkan saringan tersebut bagi murid sekolah menengah ialah tanda awal kebimbangan dan kemurungan.

Bagi murid sekolah menengah yang dikenal pasti mempunyai tanda awal kebimbangan dan kemurungan, mereka perlu menjalani intervensi menggunakan Modul Minda Sihat KPM dan Modul Kesihatan Mental Remaja KKM. Intervensi ini bertujuan untuk meningkatkan kemahiran menangani stres, kemahiran menyelesaikan masalah dan menguruskan emosi dengan baik bagi membantu murid berada dalam persekitaran yang selamat.

Di samping itu, bagi murid sekolah rendah yang berisiko, sokongan daripada ibu bapa, guru serta rakan diberikan secara berterusan bagi meningkatkan kemahiran gaya daya tindak (coping skill). Manakala murid sekolah menengah yang menunjukkan tanda kecelaruan emosi seperti kemurungan dan kebimbangan yang teruk dan sangat teruk, pihak sekolah akan berbincang bersama-sama ibu bapa/penjaga untuk merujuk murid berkenaan kepada pakar perubatan di klinik kesihatan atau hospital berdekatan.

KPM akan terus memberi perhatian kepada pengurusan kesihatan mental murid untuk memberi sokongan kepada kesejahteraan minda mereka.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KE-14**

PERTANYAAN : LISAN
DARIPADA : TUAN HASSAN BIN ABDUL KARIM
[PASIR GUDANG]
TARIKH : 18 NOVEMBER 2021 (KHAMIS)

SOALAN

TUAN HASSAN BIN ABDUL KARIM [PASIR GUDANG] minta
MENTERI KEWANGAN menyatakan adakah Kerajaan akan
melaksanakan semula sistem cukai GST bagi menggantikan SST.

JAWAPAN

Tan Sri Yang di-Pertua,

1. Untuk makluman Ahli Yang Berhormat, Kerajaan masih mengkaji kesesuaian untuk melaksanakan Cukai Barang dan Perkhidmatan (atau GST) dan model-model cukai kepenggunaan yang lain dengan mengambil kira semua aspek. Ini termasuklah kelemahan sistem cukai jualan dan cukai perkhidmatan sedia ada serta kelemahan sistem GST yang dilaksanakan pada tahun 2015.
2. Kajian ini akan meliputi kesan ke atas ekonomi, kos sara hidup, kesan cukai ke atas harga barang serta keupayaan menangani kegiatan ekonomi gelap. Cukai baharu tersebut, jika dilaksanakan, juga perlu bersifat mudah ditadbir dan tidak meningkatkan kos perniagaan di samping dapat mengukuhkan kedudukan fiskal negara.
3. Sepertimana Ahli Yang Berhormat sedia maklum, ekonomi negara sedang dalam fasa pemulihan daripada kesan krisis pandemik COVID-19. Kerajaan memahami bahawa pengenalan sebarang bentuk cukai baharu dalam keadaan ekonomi sedemikian bukan sahaja akan membebankan rakyat, malah berisiko untuk merencatkan momentum pemulihan ekonomi yang sedang berlangsung. Untuk itu, pelaksanaan sebarang bentuk cukai kepenggunaan perlu mengambil kira senario semasa. Di samping itu, ia juga memberi ruang bagi persiapan dan persediaan yang rapi di kedua-dua pihak Kerajaan dan pembayar cukai. Namun, bagi mengurangkan tekanan ke atas defisit kewangan negara, pelbagai langkah alternatif sedang diambil oleh Kerajaan untuk memperbaiki kutipan hasil berdasarkan pengenaan cukai sedia ada, dan dalam masa yang sama berusaha mengurangkan ketirisan hasil Kerajaan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KE-14**

PERTANYAAN : LISAN
DARIPADA : TUAN MA'MUN BIN SULAIMAN
[KALABAKAN]
TARIKH : 18 NOVEMBER 2021 (KHAMIS)

SOALAN

TUAN MA'MUN BIN SULAIMAN [KALABAKAN] minta **MENTERI KEWANGAN** menyatakan adakah Kerajaan bersedia meluluskan semula peruntukan pembinaan Lebuhraya Trans-Borneo dan Kompleks ICQS dan perumahan Kerajaan sebanyak RM600 Juta yang telah diperuntukkan dalam Belanjawan 2020 yang lalu tetapi dimansuhkan oleh Kerajaan Perikatan Nasional. Kalabakan memerlukan pembukaan sempadan dengan Kalimantan Indonesia untuk meningkatkan aktiviti ekonomi dan sosial kepada penduduk setempat dan bukannya hanya pembinaan Pos Kawalan Sempadan seperti yang dirancang baru-baru ini.

JAWAPAN

Tan Sri Yang di-Pertua,

1. Untuk makluman Yang Berhormat, penularan wabak Covid-19 telah memberikan kesan yang besar di seluruh dunia terutama dari segi impak kepada ekonomi negara. Kegiatan ekonomi yang terjejas menyebabkan hasil Kerajaan berkurang, dan pada masa yang sama Kerajaan perlu memberikan keutamaan untuk melaksanakan program-program dan inisiatif bagi membendung penularan wabak Covid-19 ini. Oleh yang demikian, Kerajaan telah menyemak semula beberapa inisiatif dan langkah yang telah diperkenalkan dalam Belanjawan 2020 termasuk projek Lebuh Raya Trans-Borneo dan Kompleks ICQS.

2. Namun demikian, Kerajaan menyedari kepentingan infrastruktur dan utiliti asas yang berkualiti dan berdaya harap seperti jalan raya, rel, bekalan air dan elektrik bagi merangsang pertumbuhan ekonomi agar dapat meningkatkan kesejahteraan hidup rakyat. Sehubungan itu, sekiranya projek ini hendak diteruskan, permohonan semula boleh dikemukakan kepada Kerajaan Persekutuan melalui kementerian berkenaan yang akan disalurkan kepada Unit Perancang Ekonomi (EPU), Jabatan Perdana Menteri bagi tujuan penilaian projek tersebut yang turut tertakluk kepada keperluan yang kritikal dan kedudukan kewangan semasa Kerajaan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KE-14**

PERTANYAAN : LISAN
DARIPADA : TUAN CHAN MING KAI [ALOR SETAR]
TARIKH : 18 NOVEMBER 2021 (KHAMIS)

SOALAN

TUAN CHAN MING KAI [ALOR SETAR] minta **MENTERI KEWANGAN** menyatakan berapa pembayar cukai Borang B dan BE yang membuat tuntutan tanggungan anak, senaraikan mengikut jumlah setiap anak tambahan yang ditanggung, anak 18 tahun masih belajar dan anak kurang upaya.

JAWAPAN

Tan Sri Yang di-Pertua,

1. Untuk makluman Ahli Yang Berhormat, bagi tahun taksiran 2020, jumlah pembayar cukai individu yang membuat tuntutan pelepasan anak adalah sebanyak 1,973,083 orang yang mana ia melibatkan tuntutan pelepasan anak melalui Borang B (297,209 orang) dan Borang BE (1,675,874 orang).

2. Melalui Borang B, jumlah pembayar cukai yang menuntut pelepasan anak berumur di bawah 18 tahun adalah sebanyak 225,341 orang dan melalui Borang BE sebanyak 1,239,775 orang. Bagi kategori anak berumur 18 tahun ke atas, sebanyak 65,949 orang pembayar cukai menuntut pelepasan melalui Borang B dan sebanyak 394,401 orang melalui Borang BE. Bagi anak OKU pula, sebanyak 5,919 orang pembayar cukai menuntut pelepasan melalui Borang B dan sebanyak 41,698 orang menuntut pelepasan melalui Borang BE.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

**DARIPADA : YB DATUK HAJI SHABUDIN BIN YAHAYA
[TASEK GELUGOR]**

TARIKH : 18 NOVEMBER 2021 (KHAMIS)

SOALAN

DATUK HAJI SHABUDIN BIN YAHAYA [TASEK GELUGOR] minta **MENTERI PELANCONGAN, SENI DAN BUDAYA** menyatakan apakah langkah yang diambil bagi memastikan seni persembahan yang semakin pupus seperti Ghazal Parti, Makyong, Boria dan banyak lagi kembali diperkenalkan kepada generasi muda.

JAWAPAN

Tuan Yang di-Pertua,

1. Agenda memartabatkan seni, budaya dan warisan sentiasa dijadikan fokus utama Kementerian Pelancongan, Seni dan Budaya (MOTAC) bukan sahaja untuk dipromosikan sebagai pelancongan budaya warisan, malah untuk memastikan kelestariannya pada masa yang akan datang.
2. Dalam hal ini, MOTAC menerusi Jabatan Kebudayaan dan Kesenian Negara (JKKN) telah melaksanakan penyelidikan seni budaya di peringkat negeri yang merangkumi pelbagai aspek kebudayaan seperti seni persembahan dan adat resam masyarakat setempat. Hasil penyelidikan ini akan menjadi bahan rujukan seni budaya yang boleh dimanfaatkan oleh pelbagai pihak untuk mengenali dan memahami kesenian tradisional dalam usaha melestarikannya dalam kalangan masyarakat khususnya generasi muda.
3. JKKN juga telah bekerjasama dengan universiti-universiti tempatan untuk melaksanakan program 1IPT 1 Produk Seni dalam memperkasakan produk seni budaya agar terus terpelihara. Program ini juga merupakan satu usaha menggilap dan mengetengahkan bakat dan kemahiran seni budaya dan warisan dalam kalangan penuntut IPT sebagai pelapis.
4. Sejak tahun 2007, Program Perantisan juga dilaksanakan untuk memulihara, memelihara dan mengekalkan kesenian tradisional yang hampir pupus melalui pewujudan kumpulan pelapis yang mampu menguasai segala aspek kesenian seni tradisional.
5. Sehingga kini, sebanyak 1,086 data telah direkodkan dalam Pemetaan Budaya. Pemetaan Budaya merupakan sebuah pangkalan data seni, budaya, warisan dan pelancongan yang komprehensif serta diperluaskan untuk kegunaan masyarakat khususnya generasi muda dan pelancong. Ia merupakan megadata seni, budaya, warisan merangkumi tarian, muzik, teater tradisional, adat resam, makanan tradisional, busana tradisional,

permainan tradisional, prasarana seni persembahan dan direktori NGO. Usaha menambah tiga (3) lagi kandungan baharu iaitu perayaan di Malaysia, perubatan tradisional dan menambah baik kandungan prasarana seni giat dilaksanakan pada tahun ini.

6. Sementara itu, Jabatan Warisan Negara (JWN) pula komited dalam memastikan seni persembahan yang semakin pupus dengan melaksanakan program latihan daripada semasa ke semasa di kalangan anak muda. Pakar-pakar dalam bidang berkaitan dijemput untuk mengajar di Pusat Pengembangan Warisan JWN seperti Bengkel Selendang Ikat dan Bengkel Busana dan Seni Hias Diri.

7. Selain itu, program berbentuk pertandingan turut dianjurkan agar dapat disertai oleh masyarakat khususnya generasi muda dalam memartabatkan seni warisan negara. Bantuan berbentuk keperluan logistik juga disediakan bagi mengadakan persembahan seperti pembinaan bangsal Wayang Kulit di Kelantan dan Terengganu serta pembelian lain-lain keperluan berkaitan.

8. JWN turut mengiktiraf penggiat seni sebagai Tokoh Warisan Kebangsaan Orang Hidup (WaKOH) di bawah Akta Warisan Kebangsaan 2005 (Akta 645). Sehingga kini, JWN telah mengiktiraf 27 tokoh dalam pelbagai bidang seni dan budaya seperti bangsawan, cerita rakyat, tarian, muzik, teater, seni halus dan kraf. Wataikah Pengisytiharan ini dapat membantu menggalakkan tokoh berkenaan untuk mewariskan ilmu pengetahuan kepada pelapis muda demi memastikan kelestarian seni, budaya dan warisan.

9. Pendedahan kepada generasi muda melalui aktiviti kemasyarakatan turut dilaksanakan. Contoh program yang telah dilaksanakan adalah menghantar kumpulan persembahan Mak Yong daripada pelajar Sekolah Menengah Kebangsaan Long Gafar, Kubang Keranji Kota Bharu, Kelantan ke Korea di bawah program latihan *in-situ*.

NO. SOALAN : 27

10. Di samping itu, Akademi Seni Budaya dan Warisan Kebangsaan (ASWARA) telah menjalankan pelbagai langkah bagi memastikan seni persembahan yang semakin pupus kembali diperkenalkan kepada generasi muda. Antaranya ialah mewujudkan Pusat Seni Pentas Tradisional ASWARA (PuTRA) iaitu pusat kecemerlangan dalam kesenian tradisional telah diwujudkan sejak tahun 2014. ASWARA memperkenalkan kursus-kursus wajib akademik yang menjurus kepada kesenian tradisional Malaysia seperti Mak Yong, Bangsawan, Mek Mulong, Randai dan lain-lain lagi. Kursus-kursus ini diwajibkan kepada setiap pelajar prasiswazah.

11. Tanggungjawab meneruskan tradisi dan pengekal budaya merupakan usahasama antara pelbagai pihak, dan seni persembahan perlulah diperkenalkan kepada generasi muda melalui pendekatan yang segar agar menarik minat golongan ini untuk mendalami seni tersebut. Untuk itu, penyertaan dan inisiatif semua pihak, termasuklah Ahli-Ahli Yang Berhormat, dialu-alukan untuk bersama-sama mempertahankan seni, budaya dan warisan negara daripada pupus ditelan zaman.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KE-14**

PERTANYAAN : LISAN
DARIPADA : PUAN WONG SHU QI [KLUANG]
TARIKH : 18 NOVEMBER 2021 (KHAMIS)

SOALAN

PUAN WONG SHU QI [KLUANG] minta **MENTERI KEWANGAN** menyatakan jangka masa untuk melancarkan *Integrated Cashless Payment System* untuk menyepadukan sistem tiket bagi semua perkhidmatan pengangkutan awam, khususnya di Lembah Klang serta jumlah kos projek tersebut.

JAWAPAN

Tan Sri Yang di-Pertua,

Projek sistem tiket bersepadu *Integrated Common Payment System* (ICPS) dilaksanakan oleh Transit Acquirer Sdn Bhd (TASB), yang sebelum ini merupakan anak syarikat milik penuh Suruhanjaya Pengangkutan Awam Darat (SPAD). Walau bagaimanapun, setelah Kerajaan membubarkan SPAD mulai 31 Disember 2018, Syarikat TASB telah diletakkan di bawah Menteri Kewangan Diperbadankan (MKD).

Sehubungan itu, mengambilkira kepentingan projek ICPS untuk membangunkan dan mengoperasikan sistem tiket pengangkutan awam bersepadu bagi perkhidmatan pengangkutan awam di Lembah Klang, Kerajaan telah bersetuju untuk meneruskan projek ini melalui penyertaan pihak swasta secara *Request For Proposal* (RFP) melalui tender terbuka. RFP dijangka akan dimuktamadkan pada suku pertama tahun 2022 dan tempoh pembangunan sistem dianggarkan memakan masa sekitar 18 hingga 24 bulan. Jumlah kos projek akan diteliti berdasarkan proses *due diligence* yang merupakan sebahagian daripada RFP berkenaan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

**DARIPADA : TUAN NIK NAZMI BIN NIK AHMAD
(SETIAWANGSA)**

TARIKH : 18 NOVEMBER 2021 (KHAMIS)

SOALAN

TUAN NIK NAZMI BIN NIK AHMAD minta **MENTERI KANAN PENDIDIKAN** menyatakan apakah perancangan Kementerian untuk menjadikan Sekolah Kebangsaan sebagai sekolah pilihan ibu bapa.

JAWAPAN

Tuan Yang di-Pertua,

Untuk makluman Ahli Yang Berhormat, Kementerian Pendidikan Malaysia (KPM) sentiasa berusaha untuk memperkasakan sekolah kebangsaan (SK) melalui langkah yang berikut:

- i. menyediakan infrastruktur yang lengkap dan berkualiti;
- ii. mengupayakan pemimpin dan guru yang cekap, kompeten dan berkualiti;
- iii. memastikan semua murid Tahap 1 menguasai 3M (membaca, menulis dan mengira);
- iv. memastikan kemenjadian murid secara holistik yang merangkumi aspek kognitif, afektif dan psikomotor;
- v. menyediakan sistem sokongan yang kuat dan mencukupi;
- vi. menyediakan iklim dan budaya sekolah yang sihat;
- vii. menawarkan dan melaksanakan kurikulum berasaskan pelanggan; dan
- viii. memantapkan pelaksanaan aktiviti kokurikulum dan sukan.

Di samping itu, KPM telah menawarkan mata pelajaran bahasa tambahan di SK, iaitu Bahasa Cina Komunikasi, Bahasa Tamil Komunikasi dan Bahasa Arab Komunikasi bagi menjadikan SK sebagai sekolah pilihan masyarakat. KPM juga mempunyai perancangan memperluaskan penawaran bahasa tambahan ini di lebih banyak SK dalam usaha menjadikan sekolah tersebut sebagai sekolah pilihan.

KPM akan terus memperkasa SK melalui inisiatif yang telah digariskan dalam Pelan Pembangunan Pendidikan Malaysia Tahun 2013-2025.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

**DARIPADA : DATUK DR. SHAHRUDDIN BIN MD. SALLEH
(SRI GADING)**

TARIKH : 18 NOVEMBER 2021 (KHAMIS)

SOALAN

DATUK DR. SHAHRUDDIN BIN MD. SALLEH minta **MENTERI KANAN PENDIDIKAN** menyatakan tentang status dan hak jika seorang guru tidak mahu mengambil vaksin dan adakah Kementerian akan mengenakan tindakan undang-undang terhadap guru tersebut.

JAWAPAN

Tuan Yang di-Pertua,

Kementerian Pendidikan Malaysia (KPM) komited untuk menyediakan persekitaran sekolah yang selamat bagi pengajaran dan pembelajaran (PdP) secara bersemuka. Dalam hal ini, KPM sentiasa memantau rapi status vaksinasi warga sekolah termasuk guru, anggota kumpulan pelaksana dan pekerja sokongan sekolah.

Guru adalah penjawat awam yang tertakluk kepada peraturan yang dikeluarkan oleh Jabatan Perkhidmatan Awam (JPA). Oleh itu, KPM akan mengambil tindakan sewajarnya berdasarkan Pekeliling Perkhidmatan Bilangan 4 Tahun 2021 yang disediakan oleh JPA. Selaras dengan pekeliling tersebut, KPM akan memastikan guru yang enggan divaksin perlu melengkapkan vaksinasi kecuali mereka yang mendapat pengesahan daripada pengamal perubatan berdaftar. Sekiranya guru tersebut masih gagal mematuhi arahan ini, mereka boleh dikenakan tindakan tatatertib.

Pada masa yang sama, KPM secara berterusan mengadakan konsultasi untuk memastikan semua guru menerima vaksin. KPM turut melaksanakan pelbagai program kesedaran vaksinasi melalui sesi libat urus, serta pendekatan secara berhemah seperti pujukan oleh bahagian, jabatan pendidikan negeri dan pejabat pendidikan daerah. Guru yang tidak boleh divaksin atas sebab kesihatan perlu mengemukakan maklumat kesihatan yang telah disahkan oleh pegawai perubatan kerajaan kepada Ketua Jabatan masing-masing.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT
PARLIMEN KE-EMPAT BELAS**

PERTANYAAN : JAWAB LISAN

DARIPADA : YB TUAN LIM GUAN ENG (BAGAN)

TARIKH : 18 NOVEMBER 2021 (KHAMIS)

SOALAN

TUAN LIM GUAN ENG [BAGAN] minta **MENTERI PENGANGKUTAN** menyatakan tentang penjimatan kos projek ECRL mengikut jajaran baru berbanding dengan penjimatan sebanyak RM21.5 bilion di bawah kerajaan Pakatan Harapan dan sama ada jajaran telah pun dimuktamadkan merentasi negeri mana.

JAWAPAN

Tuan Yang di-Pertua,

Kerajaan telah mengkaji jajaran terbaik bagi memastikan ECRL memberi impak ekonomi yang maksima apabila disiapkan kelak. Jajaran yang terbaik dan memberi impak maksima kepada rakyat adalah seperti yang diumumkan pada 5 April 2021 di mana ECRL melalui 4 buah negeri iaitu Kelantan, Terengganu, Pahang dan Selangor. Laluan ECRL bagi Seksyen C akan melalui kawasan utara negeri Selangor iaitu Temerloh-Gombak-Serendah-Pelabuhan Klang.

Dalam mencadangkan jajaran utara, Kerajaan telah mengambilkira keperluan segera untuk membina landasan pintas Pelabuhan Klang-Serendah (Serendah Bypass), kesalinghubungan di antara perkhidmatan ECRL dan KTMB, permintaan kargo, sambungan terus ECRL ke pelabuhan Westports dan Northport melalui pembaharuan trek KTMB sedia ada dan kesan berganda kepada alam sekitar dan sosial sekiranya projek Serendah Bypass dilaksanakan secara berasingan. Selain itu, lebih banyak kawasan hutan simpan perlu ditarah untuk pembinaan projek, iaitu sepanjang 6.5 km (pelbagai lokasi) jika dilaksanakan berasingan berbanding hanya 2.5km sekiranya kedua-dua projek dilaksanakan dalam skop ECRL.

Dari aspek logistik, Kementerian Pengangkutan telah meneliti jajaran selatan ECRL Seksyen C dan mendapati jajaran tersebut tidak memberi kelebihan dari segi perkhidmatan logistik dalam jangka masa panjang memandangkan tumpuan lebih diberikan kepada perkhidmatan penumpang. Dalam hubungan ini, jajaran selatan tersebut tidak mempunyai cukup daya tarikan bagi melonjakkan aktiviti logistik di sepanjang jajarannya serta menjadikan ECRL sebagai laluan logistik rel. Selain impak kewangan, pembinaan jajaran baharu ECRL beserta Serendah Bypass akan mengakibatkan impak sosial, alam sekitar dan tadahan air dua kali ganda berbanding hanya membina jajaran asal. Semua implikasi ini dapat dielakkan dengan membina ECRL Seksyen C menggunakan jajaran asal iaitu jajaran utara.

Berkenaan dengan kos pembinaan, kos terkini ECRL adalah RM50.27 bilion termasuk pembinaan Laluan Pintas Serendah-Pelabuhan Klang (Serendah Bypass), landasan *dual-gauge* yang dari Stesen Jalan Kastam

ke Westport/Northport, pembinaan terowong sepanjang 14 km di antara Gombak dan Serendah serta langkah-langkah penyelesaian teknikal bagi meminimumkan impak sosial dan alam sekitar di Negeri Selangor.

Dari satu segi, penjajaran semula ini merupakan satu penjimatan sebanyak RM16.51 bilion kepada Kerajaan memandangkan kos asal projek ini pada tahun 2017 ialah RM66.78 bilion (termasuk Serendah Bypass) berbanding sekarang iaitu sebanyak RM50.27 bilion.

Kos pembinaan ini memberikan *value for money* di mana ia meningkatkan ketersambungan rel kargo ke hub kargo aktif melalui pembinaan Serendah *Bypass*. Ketersambungan ini meningkatkan daya tarikan untuk pemindahan mod dari jalan raya ke rel, meningkatkan kapasiti kargo bagi jaringan rel sedia ada serta menyelesaikan isu laluan kargo dari/ke utara (Pintasan Utara Serendah-Pelabuhan Klang). Faktor-faktor ini bakal menyumbang kepada aktiviti pengangkutan rel kargo yang lebih aktif di sepanjang jaringan keretapi Pantai Barat dan Pantai Timur, seterusnya meningkatkan pergerakan kargo melalui rel di seluruh negara yang kini hanya sekitar 5% sahaja.

Kelebihan dari aspek logistik ini dicapai tanpa mengurangkan tawaran servis keretapi kepada penumpang di mana transit bagi pengguna ECRL adalah di projek yang sedang dibangunkan kini iaitu Integrated Transport Terminal (ITT) Gombak, Selangor. Ketersambungan ECRL dengan ITT Gombak akan membolehkan penumpang dari negeri-negeri Pantai Timur untuk terhubung terus kepada beberapa rangkaian rel dan perkhidmatan bas. ITT Gombak ini bakal menyediakan ketersambungan kepada LRT terus ke KL Sentral (akses ke laluan MRT 2 dan ERL terus ke KLIA) serta perkhidmatan bas henti-henti/ekspres.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

**DARIPADA : DATUK SERI HAJI SALAHUDDIN BIN AYUB
(PULAI)**

TARIKH: 18 NOVEMBER 2021 (KHAMIS)

SOALAN

DATUK SERI HAJI SALAHUDDIN BIN AYUB minta **MENTERI KANAN PENDIDIKAN** menyatakan perkembangan terkini program pemberian 150,000 komputer riba/peranti digital yang telah dijanjikan.

JAWAPAN

Tuan Yang di-Pertua,

Untuk makluman Ahli Yang Berhormat, inisiatif Tabung CERDIK seperti yang diluluskan dalam Belanjawan 2021 adalah satu inisiatif pemberian peranti digital lengkap dengan pelan data kepada 150,000 orang murid B40 yang dilaksanakan oleh Yayasan Hasanah, sebuah yayasan di bawah Khazanah Nasional. Tabung CERDIK merupakan satu inisiatif tanggung jawab sosial korporat (CSR) oleh syarikat berkaitan kerajaan (GLC) dan syarikat pelaburan berkaitan kerajaan (GLIC). Untuk makluman Ahli Yang Berhormat, kesemua 150,000 peranti digital di bawah inisiatif ini telah selesai diagihkan kepada murid B40 terpilih pada 29 Oktober 2021.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

**DARIPADA : PUAN KASTHURIRAANI A/P PATTO
(BATU KAWAN)**

TARIKH : 18 NOVEMBER 2021 (KHAMIS)

SOALAN

PUAN KASTHURIRAANI A/P PATTO minta **MENTERI KANAN PENDIDIKAN** menyatakan peruntukan pengurusan dan pembangunan yang akan disalurkan kepada semua sekolah di Pulau Pinang mengikut pecahan kawasan Parlimen bagi tahun 2019, 2020 dan sehingga kini bagi SK, SJK, SJKT, SJKC, Sekolah Agama Bantuan Kerajaan dan Sekolah Mubaligh.

JAWAPAN

Tuan Yang di-Pertua,

Untuk makluman Ahli Yang Berhormat, Akta Pendidikan 1996 (Akta 550) menetapkan bahawa kerajaan bertanggungjawab sepenuhnya ke atas peruntukan kepada sekolah kerajaan (SK) dan pada masa yang sama, kerajaan boleh memberi sumbangan bantuan kepada sekolah bantuan kerajaan (SBK) di bawah Kementerian Pendidikan Malaysia (KPM). Untuk sekolah berstatus SBK, kerajaan menyediakan peruntukan untuk bayaran emolumen dan elaun guru, utiliti, kawalan keselamatan dan pembersihan kawasan, peralatan pengajaran dan pembelajaran serta pemberian bantuan geran perkapita (PCG). KPM turut menyediakan pelbagai bantuan persekolahan kepada murid di SBK yang layak seperti mana yang diterima oleh murid di SK.

Untuk makluman Ahli Yang Berhormat, KPM menyalurkan peruntukan kepada sekolah-sekolah melalui Jabatan Pendidikan Negeri (JPN) dan Pejabat Pendidikan Daerah (PPD) masing-masing mengikut keperluan. Jumlah peruntukan mengurus yang telah disalurkan kepada JPN dan PPD dengan jumlah sebanyak RM904.6 juta bagi tahun 2019, RM922.9 juta bagi tahun 2020 dan RM929.9 juta bagi tahun 2021. Pecahan peruntukan mengurus mengikut PPD adalah seperti di **Lampiran A**.

Manakala, peruntukan pembangunan SK di Pulau Pinang adalah RM466.06 juta bagi tahun 2019, RM490.27 juta bagi tahun 2020 dan RM598.61 juta bagi tahun 2021 berjumlah. Perincian peruntukan mengikut Parlimen adalah seperti di **Lampiran B**.

Lampiran A :Pecahan peruntukan mengurus mengikut PPD

BIL	PPD	JUMLAH
(i)	PPD Seberang Perai Utara	2019 - RM296 juta 2020 - RM354.6 juta 2021 - RM327.6 juta
(ii)	PPD Seberang Perai Tengah	2019 - RM194.2 juta 2020 - RM155.8 juta 2021 - RM154 juta
(iii)	PPD Seberang Perai Selatan	2019 - RM94.3 juta 2020 - RM101.6 juta 2021 - RM124.7 juta
(iv)	PPD Timur Laut	2019 - RM223.9 juta 2020 - RM213.3 juta 2021 - RM214.3 juta
(v)	PPD Barat Daya	2019 - RM96.2 juta 2020 - RM97.9 juta 2021 - RM109.3 juta

Lampiran B :Pecahan peruntukan pembangunan mengikut kawasan parlimen

BIL	PARLIMEN	JUMLAH
(i)	Kepala Batas	2019 - RM108.5 juta 2020 - RM109.27 juta 2021 - RM108.91 juta
(ii)	Tasek Gelugor	2019 - RM58.25 juta 2020 - RM84.01 juta 2021 - RM101.10 juta
(iii)	Permatang Pauh	2019 - RM0.81 juta 2020 - RM0.81 juta 2021 - RM0.88 juta
(iv)	Bukit Mertajam	2019 - RM93.5 juta 2020 - RM92.58 juta 2021 - RM92.28 juta
(v)	Batu Kawan	2019 - RM7.24 juta 2020 - RM7.63 juta 2021 - RM6.94 juta
(vi)	Nibong Tebal	2019 - RM10.6 juta 2020 - RM10.6 juta 2021 - RM11.83 juta
(vii)	Tanjong	2019 - RM52.42 juta 2020 - RM52.42 juta 2021 - RM52.4 juta
(viii)	Jelutong	2019 - RM3.32 juta 2020 - RM3.32 juta 2021 - RM3.85 juta

SOALAN NO : 33

BIL	PARLIMEN	JUMLAH
(ix)	Bukit Gelugor	2019 - RM68.05 juta 2020 - RM66.25 juta 2021 - RM109.71 juta
(x)	Bayan Baru	2019 - RM22.81 juta 2020 - RM22.81 juta 2021 - RM22.81 juta
(xi)	Balik Pulau	2019 - RM22.98 juta 2020 - RM22.98 juta 2021 - RM43.74 juta
(xii)	Pelbagai Parlimen	2019 - RM17.54 juta 2020 - RM17.54 juta 2021 - RM44.09 juta

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KE-14**

PERTANYAAN : LISAN
DARIPADA : TUAN LIM GUAN ENG [BAGAN]
TARIKH : 18 NOVEMBER 2021 (KHAMIS)

SOALAN

TUAN LIM GUAN ENG [BAGAN] minta **MENTERI KEWANGAN** menyatakan senarai keuntungan industri perbankan setiap tahun sejak 2017 dan kos yang ditanggung oleh bank susulan moratorium pinjaman bank yang dilaksanakan pada 2020 dan 2021 serta pengecualian bayaran faedah untuk golongan 50% penduduk Malaysia termiskin bagi tempoh 3 bulan terakhir 2021.

JAWAPAN

Tuan Yang Di-Pertua,

Untuk makluman Ahli Yang Berhormat, keuntungan industri perbankan sebelum cukai pada tahun 2017, 2018 dan 2019 masing-masing adalah melebihi RM25 bilion.

Namun begitu, pada tahun 2020, industri perbankan mencatatkan penurunan tahap keuntungan sebelum cukai, atau dengan izin, *Profit Before Tax (PBT)* yang terburuk semenjak krisis kewangan Asia pada tahun 1997 iaitu sebanyak 24.8% berbanding dengan tahun 2019. Dalam tempoh tersebut, pendapatan bank-bank telah terkesan dengan pengurangan margin faedah akibat penurunan kadar dasar semalaman (*overnight policy rate*) yang ketara, kos-kos yang berkaitan dengan pemberian bantuan bayaran balik pinjaman, peningkatan peruntukan untuk jangkaan kerugian kredit serta volatiliti pasaran kewangan.

Walaupun berhadapan dengan cabaran tersebut, kedudukan kewangan industri perbankan kekal teguh untuk terus memberikan bantuan bayaran balik pinjaman kepada pihak yang memerlukannya, di samping memenuhi keperluan pembiayaan ekonomi menerusi pengantaraan kewangan (*financial intermediation*) yang berkesan. Tambahan lagi, industri kewangan juga menampung lebih dari 370 ribu pekerja. Oleh itu, kemampanan kedudukan kewangan industri perbankan penting terutamanya dalam menyokong pemulihan ekonomi yang dijangka akan lebih meluas tahun hadapan.

Pada bulan Mac 2020, lebih 7.7 juta peminjam individu dan 243,000 perusahaan kecil dan sederhana mendapatkan moratorium pertama selama 6 bulan dengan nilai anggaran berjumlah RM100 bilion. Sejak itu, bank-bank terus memberikan moratorium dan bantuan bayaran balik pinjaman secara bersasar selepas moratorium pertama berakhir pada bulan September 2020. Apabila perintah kawalan pergerakan diperketatkan semula pada bulan Jun 2021, hampir 2.7 juta peminjam individu dan 93,000 peminjam PKS (setakat 29 Oktober 2021) telah menerima bantuan bayaran balik pinjaman dalam bentuk moratorium atau pengurangan ansuran pinjaman melalui pakej bantuan dan rangsangan ekonomi PEMERKASA+ (pada 31 Mei) dan PEMULIH (pada 28 Jun).

Dan baru-baru ini, bagi membantu peminjam menguruskan hutang mereka secara menyeluruh untuk jangka masa yang lebih panjang, pada 14 Oktober 2021, industri perbankan telah mengumumkan Program Pengurusan dan Ketahanan Kewangan (URUS) bagi golongan B50 yang masih hilang pekerjaan, atau mengalami pengurangan pendapatan sekurang-kurangnya 50% akibat pandemik COVID-19. Di bawah program ini, peminjam akan mendapatkan khidmat pelan kewangan peribadi daripada Agensi Kaunseling dan Pengurusan Kewangan (AKPK) yang mengambil kira semua pendapatan peminjam yang mampu diperuntukkan untuk membayar segala hutang peminjam di semua institusi kewangan, selepas menampung segala keperluan hidup.

Peminjam juga akan mendapat pengecualian faedah selama tiga bulan dan bantuan bayaran balik pinjaman bagi tempoh sehingga 24 bulan daripada segi penangguhan bayaran dan pengurangan bayaran ansuran

mengikut kemampuan masing-masing. Program yang menyeluruh daripada AKPK ini bukan sahaja membantu peminjam membuat bayaran balik pinjaman mengikut kemampuan mereka, malah peminjam juga mendapatkan manfaat daripada nasihat pengurusan kewangan yang boleh meningkatkan daya tahan kewangan mereka dalam jangka masa panjang.

Berdasarkan unjuran awal bagi program URUS, sekitar 1 juta peminjam B50 dijangka menerima bantuan, dengan faedah yang akan dikecualikan adalah sekitar RM1 bilion. Namun, dalam persekitaran ekonomi yang semakin pulih, ada kemungkinan jumlah pemohon menjadi lebih kecil daripada yang dijangkakan.

Melangkah ke hadapan, seperti yang diumumkan melalui Bajet 2022, pihak perbankan dijangka akan menjadi antara penyumbang utama terhadap pemeraksanaan sistem kesihatan negara dan kesejahteraan rakyat melalui pengenaan Cukai Makmur. Ini adalah kerana kebanyakan daripada bank-bank secara puratanya telah merekodkan keuntungan sebelum cukai melebihi RM100 juta bagi tahun-tahun sebelum ini.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KE-14**

PERTANYAAN : LISAN
DARIPADA : TUAN SYED SADDIQ BIN SYED ABDUL
RAHMAN [MUAR]
TARIKH : 18 NOVEMBER 2021 (KHAMIS)

SOALAN

TUAN SYED SADDIQ BIN SYED ABDUL RAHMAN [MUAR] minta **MENTERI KEWANGAN** menyatakan persediaan negara untuk menerima sistem kewangan alternatif (alternative financing) seperti matawang kripto sebagai sebahagian dari struktur kewangan yang diiktiraf oleh Bank Negara Malaysia dan menjadikan ia fokus dalam dasar kewangan negara untuk tahun 2022.

JAWAPAN

Yang Di-Pertua,

1. Matawang kripto (*cryptocurrency*) atau aset digital (*digital asset*) tidak diiktiraf sebagai matawang yang sah diperlakukan (*legal tender*) di Malaysia dan bukan merupakan instrumen pembayaran yang dikawal selia oleh Bank Negara Malaysia (BNM). Aset digital seperti Bitcoin dan Ethereum tidak sesuai digunakan sebagai instrumen pembayaran disebabkan aset ini tidak menunjukkan ciri-ciri universal wang. Secara umumnya, aset digital bukan penyimpan nilai dan medium pertukaran yang baik disebabkan keadaan aset digital yang terdedah kepada turun naik harga yang tidak menentu akibat pelaburan spekulatif, risiko kecurian akibat ancaman siber dan kekurangan daripada segi boleh skala (*scalability*).
2. Di Malaysia, sistem pembayaran domestik, termasuk Platform Pembayaran Runcit Masa Nyata (*Real-time Retail Payments Platform, RPP*) terus beroperasi dengan selamat dan cekap untuk menyokong keperluan ekonomi dan membolehkan pembayaran digital masa nyata. Selain itu, sistem kewangan di Malaysia terus menyokong fungsi ekonomi di samping memenuhi keperluan individu dan perniagaan.
3. Bagi menangani risiko berkaitan aktiviti aset digital, BNM telah mengeluarkan kenyataan dari semasa ke semasa untuk mengingatkan orang ramai agar berhati-hati dalam menilai risiko berurusan dalam aset digital. Selain itu, BNM dan Suruhanjaya Sekuriti Malaysia (SC) juga telah memeterai pengaturan penyelarasan untuk aktiviti aset digital. Ini bertujuan untuk menyokong inovasi industri dan pada masa yang sama memastikan risiko berkaitan aktiviti aset digital tetap terkawal serta langkah-langkah integriti kewangan kekal berkesan. Dalam hal ini, pihak SC sebagai pengawal selia utama bagi aktiviti aset digital, bertanggungjawab dalam pengawalseliaan aktiviti dagangan aset digital serta aktiviti perolehan dana melalui Tawaran Awal Bursa (*Initial Exchange Offering, IEO*).

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

**DARIPADA : TUAN AHMAD FAHMI BIN MOHAMED FADZIL
[LEMBAH PANTAI]**

TARIKH : 18 NOVEMBER 2021 (KHAMIS)

SOALAN

Minta **MENTERI PENGAJIAN TINGGI** menyatakan bilangan mesyuarat yang telah dilaksanakan oleh Jawatankuasa Kerja Penambahbaikan Akta Universiti dan Kolej Universiti 1971 (AUKU) sejak penubuhannya pada September 2020 dan hasil perbincangan bagi setiap mesyuarat tersebut.

JAWAPAN

Tan Sri Yang di-Pertua,

Kementerian sentiasa prihatin dan responsif ke atas aspirasi pelbagai pihak yang inginkan AUKU ditambah baik dari semasa ke semasa. Atas dasar inilah, AUKU telah mengalami proses pindaan sebanyak tujuh (7) kali sejak ia diwartakan pada tahun 1971 hingga pindaan terakhir pada tahun 2019 yang memansuhkan Seksyen 15(2)(c) AUKU yang telah memberi lebih ruang dan kebebasan kepada pelajar untuk bersuara dan berpolitik di dalam kampus.

Kementerian juga telah menubuhkan Jawatankuasa Kerja Penambahbaikan AUKU untuk penambahbaikan berterusan pada bulan September 2020 melibatkan 37 ahli yang terdiri daripada pakar perlembagaan, pakar perundangan, pakar pendidikan tinggi dan wakil pengurusan tertinggi universiti. Selain itu, Kementerian turut melantik

wakil persatuan kakitangan akademik, pentadbir dan kakitangan sokongan, wakil persatuan IPTS, wakil NGO dan wakil persatuan pelajar bagi memastikan sebarang cadangan penambahbaikan adalah bersifat komprehensif dan merangkumi semua pihak berkepentingan.

Kementerian juga telah mengadakan beberapa sesi libat urus dengan pihak-pihak berkepentingan, antaranya bersama Majlis Perwakilan Pelajar Kebangsaan (MPPK) yang telah diadakan pada 14 September 2021. Melalui sesi tersebut, isu-isu seperti pengurusan aktiviti pelajar iaitu kebenaran untuk mengumpul dana; pembukaan akaun bank bagi maksud pungutan wang aktiviti pelajar; pengwujudan kesatuan pelajar dan kebebasan untuk berpersatuan telah dibincangkan. Sebahagian daripada isu yang dibangkitkan ini telah mempunyai mekanisme pelaksanaan sedia ada di peringkat Universiti Awam, manakala bakinya akan diperhalusi untuk pelaksanaannya.

Sesi libat urus susulan bersama MPPK dan Majlis Presiden Persatuan Akademik turut berlangsung pada 28 hingga 30 Oktober 2021 melibatkan perbincangan isu-isu, cabaran, maklum balas, pandangan dan input terkini berkaitan AUKU. Antara cadangan penambahbaikan yang dikemukakan adalah termasuk perkara yang melibatkan peruntukan khas definisi bagi pekerja/ kakitangan universiti, cadangan pengecualian Akta 605 melalui pindaan AUKU, melihat semula komposisi keahlian Senat dan Lembaga Pengarah Universiti dan menambahbaik Kaedah Tatatertib Pelajar agar lebih relevan dengan keadaan semasa. Kementerian juga boleh melihat semula seksyen 15 dan 16 AUKU agar peruntukannya dapat memperkasa dan memberi hak upaya kepada pelajar.

Justeru, usaha menambahbaik AUKU adalah satu usaha yang berterusan dalam memastikan AUKU kekal relevan. Kementerian sentiasa terbuka dengan sebarang cadangan penambahbaikan AUKU dan akan mempergiatkan sesi libat urus dengan semua pemegang taruh dan pihak berkepentingan termasuk pelajar bagi menyesuaikan Akta ini dengan keperluan semasa kini.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KE-14**

PERTANYAAN : LISAN
DARIPADA : TUAN SYED IBRAHIM BIN SYED NOH
[LEDANG]
TARIKH : 18 NOVEMBER 2021 (KHAMIS)

SOALAN

TUAN SYED IBRAHIM BIN SYED NOH [LEDANG] minta **MENTERI KEWANGAN** menyatakan berkenaan jaminan kerajaan dalam pinjaman RM 500 juta kepada AirAsia Group Berhad :-

- (a)apakah pertimbangan Kerajaan dalam menawarkan jaminan kepada hutang bernilai separuh bilion ringgit sedangkan AirAsia mempunyai rekod hutang tertunggak yang tinggi; dan
- (b)apakah “recourse” kepada Kerajaan sekiranya Air Asia gagal membayar pinjaman tersebut yang boleh memudaratkan industri pelancongan dan rakyat.

JAWAPAN

Tuan Yang di-Pertua,

Untuk makluman Ahli Yang Berhormat, Skim Jaminan PRIHATIN Danajamin (SJPD) merupakan sebuah skim bantuan pembiayaan berjaminan Kerajaan yang diumumkan oleh mantan YAB Perdana Menteri di dalam ucapan PRIHATIN pada 27 Mac 2021 berikutan penularan pandemik COVID-19 di seluruh dunia. SJPD diperkenalkan sebagai langkah jangka pendek dan sederhana, bagi menyokong keupayaan kredit sektor korporat supaya mampu berdaya tahan. Oleh itu, bagi memastikan kecairan berterusan dalam pasaran modal, institusi kewangan memerlukan mekanisme jaminan daripada Kerajaan untuk meningkatkan keyakinan institusi kewangan dalam menyediakan kemudahan pinjaman.

Dalam masa yang sama, kepentingan Kerajaan turut diambil kira dalam memastikan komitmen kewangan Kerajaan tidak bertambah akibat pendedahan risiko kewangan. Sehubungan itu, Danajamin selaku pelaksana terhadap skim ini telah dilantik atas rekod pengurusanannya yang baik dan efisien. Sebarang permohonan untuk skim ini akan diurus dan disemak secara teliti oleh Danajamin bagi memastikan risiko pendedahan yang Kerajaan terima tidak terlalu membebankan.

Sebagaimana Ahli Yang Berhormat sedia maklum, Kerajaan tidak menghalang mana-mana syarikat untuk menyertai skim ini dan ini termasuklah syarikat AirAsia yang kita sedia maklum sedang mengalami masalah kewangan akibat pandemik COVID-19. Oleh itu, Danajamin telah menerima permohonan tersebut dari institusi-institusi kewangan yang secara bersama (*syndicated*) telah meluluskan kemudahan pembiayaan modal kerja kepada AirAsia sebanyak RM300 juta dengan jaminan Kerajaan sebanyak 80% daripada jumlah pembiayaan. Walau bagaimanapun, mengambilkira permohonan pembiayaan oleh AirAsia adalah berjumlah RM500 juta, kelulusan jaminan ke atas pembiayaan oleh AirAsia adalah juga tertakluk kepada keupayaan AirAsia untuk mendapatkan tambahan pembiayaan sehingga RM500 juta.

Secara amnya, permohonan oleh AirAsia ini telah memenuhi syarat-syarat yang ditetapkan di bawah skim ini yang turut diguna pakai bagi semua permohonan syarikat-syarikat lain dan tiada layanan khas diberikan kepada mana-mana syarikat. Sekiranya AirAsia gagal melaksanakan pembayaran pinjaman tersebut, obligasi Kerajaan ke atas pinjaman tersebut secara efektifnya adalah berjumlah RM240 juta dari jumlah prinsipal pembiayaan manakala selebihnya akan ditanggung oleh institusi-institusi kewangan terlibat. Selain itu, Kerajaan turut mempunyai hak ke atas sekuriti yang dicagarkan untuk pemberian jaminan serta berhak untuk mengambil tindakan undang-undang yang sewajarnya di bawah proses pemulihan hutang terhadap AirAsia.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

DARIPADA : DATUK DR. HASAN BIN BAHROM [TAMPIN]

TARIKH : 18 NOVEMBER 2021(KHAMIS)

SOALAN

DATUK DR. HASAN BIN BAHROM [TAMPIN] Minta **MENTERI PERTANIAN DAN INDUSTRI MAKANAN** menyatakan tindakan yang telah dan akan dilakukan bagi mengatasi pemasaran hasil pertanian yang dikeluarkan oleh masyarakat luar bandar dan apakah bantuan yang boleh diberikan kepada golongan ini.

JAWAPAN

Tuan Yang Di Pertua,

Untuk makluman Ahli Yang Berhormat, selain bantuan input pertanian, Kementerian Pertanian dan Industri Makanan (MAFI) juga menyediakan pelbagai bantuan dan inisiatif untuk membantu para petani di kawasan luar bandar memasarkan hasil tanaman mereka.

Pertama, membangunkan Pusat Pengumpulan Ladang (PPL) di bawah program Ladang Kontrak MAFI sebagai pusat pengumpulan hasil pertanian daripada petani di kawasan setempat. Melalui program ini, MAFI dapat membangunkan usahawan pemasar di samping menyediakan ruang pemasaran kepada pengeluar hasil pertanian. Sehingga kini, terdapat 190 PPL di seluruh negara dengan nilai kendalian sehingga 31 Oktober 2021 sebanyak RM31.40 juta.

Kedua, bantuan khidmat pepadanan perniagaan dengan outlet peruncitan usahawan pemasar bimbingan FAMA seperti Pasar Tani Kekal (PTK), Agrobazaar Kedai Rakyat (AKR) dan Agrobazaar Rakyat (ABR). Petani boleh menghubungi pejabat FAMA daerah terdekat bagi mendapatkan bantuan pepadanan perniagaan dengan usahawan pemasar yang berhampiran. Sehingga 31 Oktober 2021, terdapat 31 Pasar Tani Kekal, 326 Agrobazaar Kedai Rakyat dan 166 Agrobazaar Rakyat di seluruh Malaysia. Selain pemasaran di outlet fizikal, MAFI turut menggalakkan para petani untuk memasarkan hasil pertanian menggunakan platform e-dagang Agrobazaar Online (ABO). Petani yang berminat untuk menyertai ABO akan diberi latihan untuk menguruskan transaksi jualan atas talian. Sehingga 31 Oktober 2021, seramai 6,107 usahawan telah berdaftar di platform ABO dengan transaksi jualan berjumlah RM9.1 juta.

Ketiga, pengeluar yang mempunyai kemampuan dan lokasi pasaran yang strategik boleh memohon insentif peralatan pemasaran di bawah program Gerai Buah-Buahan Segar (GBBS). Selain itu, petani juga boleh memohon untuk berniaga di Pasar Tani yang

berhampiran. Sehingga 31 Oktober 2021, terdapat 329 Gerai Buah-Buahan Segar dan 312 Pasar Tani dengan 13,181 orang usahawan di seluruh Malaysia.

Keempat, MAFI turut menyediakan bantuan program pembangunan usahawan melalui kursus dan latihan berkaitan pemasaran. Antara kursus dan seminar yang dilaksanakan termasuklah berkaitan pemasaran Digital, Kursus *Reskilling* dan *Upskilling* serta *New Breed Marketing Entrepreneur* (NBME).

Kelima, bantuan khidmat nasihat pembangunan produk. Melalui bantuan khidmat nasihat ini, kebolehpasaran produk usahawan luar bandar dapat dipertingkatkan dengan menambahbaik reka bentuk pembungkusan dan pelabelan yang menarik serta memenuhi keperluan piawaian di samping menggunakan teknologi yang mampu meningkatkan ketahanan dan keselamatan produk. Selain itu, khidmat nasihat untuk penjenamaan dan promosi juga disediakan.

Selain lima bantuan yang telah dinyatakan, MAFI juga menggalakkan petani terutamanya petani baharu untuk menyertai Program Ladang Kontrak MAFI bagi membantu mengurangkan risiko kepada mereka melalui jaminan pasaran serta harga lantai menerusi perjanjian *Forward Agreement*. Pada tahun 2021, MAFI menyasarkan 550 *Forward Agreement* dengan sasaran belian sebanyak 5,500 tan metrik dengan nilai RM11 juta yang memberi manfaat kepada 1,000 pengeluar. Sehingga 31 Oktober 2021, sebanyak 747 *Forward Agreement* telah ditandatangani dengan kuantiti belian sebanyak 13,425 tan metrik yang bernilai sebanyak RM17.57 juta dan telah memberi manfaat kepada 1000 orang pengeluar di seluruh negara.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS TAHUN 2021**

PERTANYAAN : LISAN

DARIPADA : PUAN NOORITA BINTI SUAL [TENOM]

TARIKH : 18 NOVEMBER 2021 (KHAMIS)

SOALAN

PUAN NOORITA BINTI SUAL [TENOM] minta **MENTERI PERTANIAN DAN INDUSTRI MAKANAN** menyatakan adakah benar bahawa keengganan Petronas menjual baja urea kepada pembeli tempatan merupakan salah satu penyebab harga sayur-sayuran tempatan khususnya di Sabah semakin meningkat dan membimbangkan terutama semasa pandemik COVID-19 ini memandangkan Sabah terlalu bergantung dengan baja yang diimport dari China. Apakah langkah-langkah jangka pendek dan langkah jangka panjang yang diambil oleh Kerajaan dalam menangani masalah ini.

JAWAPAN

Tuan Yang Di Pertua,

Untuk makluman Ahli Yang Berhormat, Kementerian Pertanian dan Industri Makanan (MAFI) prihatin terhadap isu kenaikan kos input pertanian khususnya baja yang berlaku semenjak pandemik COVID-19 melanda seluruh dunia. Kebanyakan baja yang digunakan oleh petani dihasilkan daripada bahan mentah yang diimport daripada negara luar seperti unsur nitrogen, fosfat (*phosphate*) dan kalium (*potassium*). Antara negara pengeksport utama bahan mentah bagi penghasilan baja adalah Republik Rakyat China (RRC) dan India. Perubahan dasar

semasa oleh negara pengeksport bagi menjamin kelangsungan sumber di negara berkenaan telah menyebabkan pengeksportan turut berkurang. Selain itu, gangguan penghasilan bahan mentah juga menjadi punca kekurangan stok baja dan racun di pasaran dunia. Antaranya, penutupan kilang-kilang pembekal bahan mentah di wilayah Shanxi di utara RRC yang terjejas teruk akibat banjir besar serta penutupan stesen janakuasa di Texas, Amerika Syarikat yang menyebabkan kilang tidak dapat beroperasi.

Faktor-faktor lain seperti kenaikan harga petroleum yang diperlukan bagi menghasilkan sebahagian produk akhir baja serta peningkatan kos logistik terutamanya aktiviti perkapalan turut menyumbang kepada kenaikan harga baja di pasaran tempatan. Apabila bekalan baja berkurangan di pasaran sedangkan permintaan sentiasa berterusan, peningkatan harga berlaku di sepanjang rantai pembekalan produk tersebut.

Kementerian Pertanian dan Industri Makanan (MAFI) dan Kementerian Perdagangan Dalam Negeri dan Hal Ehwal Pengguna (KPDNHEP) juga telah menubuhkan Jawatankuasa Bersama Berkenaan Isu Kenaikan Harga Baja dan Racun sebagai usaha bersepadu untuk meneliti cadangan tindakan dan kaedah penyelesaian serta langkah-langkah lain dalam membantu petani dan pengusaha kecil yang berhadapan dengan isu kenaikan harga baja dan racun secara mendadak.

Untuk makluman Ahli Yang Berhormat jua, beberapa cadangan penyelesaian telah diangkat oleh MAFI dan KPDNHEP secara bersama untuk pertimbangan Jemaah Menteri pada 12 November dengan memberi penekanan supaya kesan pelaksanaan mana-mana inisiatif, intervensi dan program kelak dapat dirasai oleh rakyat secara berpanjangan. Antara cadangan yang sedang dipertimbangkan untuk menangani isu ini termasuk melalui pelaksanaan subsidi atau insentif bersasar kepada golongan petani yang terkesan.

MAFI dan KPDNHEP sentiasa peka dengan kenaikan harga baja dan racun bagi memastikan produktiviti pengeluaran tidak terjejas dan bekalan sentiasa mencukupi dengan harga yang stabil dan berpatutan.

Pada masa yang sama, bagi membantu mengurangkan kesan kenaikan harga baja dan kebergantungan kepada baja import, (MAFI) melalui Jabatan dan Agensi juga telah mengambil inisiatif dan langkah-langkah berikut:-

- 1) Menggalakkan penggunaan baja-baja yang dihasilkan oleh pengeluar tempatan
- 2) Menggalakkan dan mempromosikan penggunaan input pertanian berasaskan mikroorganisma berfaedah (*Effective Microorganism*) seperti 'Plant Booster', 'Growth Enhancer' dan 'Bokashi'.
- 3) Menggalakkan penggunaan bahan sisa tanaman seperti jerami padi untuk dijadikan baja kompos.
- 4) Menjalankan aktiviti pengembangan bagi mendidik petani untuk menggunakan baja dan racun mengikut keperluan dan sukatan yang tepat dengan teknik-teknik yang betul supaya penggunaan baja dan racun adalah berkesan.

Manakala bagi menangani masalah kualiti baja dalam jangka panjang, MAFI juga mewujudkan satu Rang Undang-Undang khusus untuk mengawalselia industri baja. Rang Undang-Undang ini sedang diperingkat akhir gubalan dan akan dibentangkan di Parlimen apabila telah siap. Rang Undang-Undang ini dijangka dapat mengatasi isu-isu berkaitan baja dan meningkatkan pengeluaran hasil pertanian negara melalui penghasilan baja yang berkualiti dan mengikut standard yang dipraktik.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KETIGA,
PARLIMEN KEEMPAT BELAS**

PERTANYAAN : JAWAB LISAN

**DARIPADA : DATO SERI TIONG KING SING
[BINTULU]**

TARIKH : 18 NOVEMBER 2021 (KHAMIS)

SOALAN

minta **MENTERI KOMUNIKASI DAN MULTIMEDIA** menyatakan :-

- (a) apakah pihak Kementerian mempunyai rancangan untuk menaik taraf rangkaian internet secara keseluruhan di Bintulu dalam masa terdekat memandangkan Bintulu semakin membangun dengan adanya pelaburan asing; dan
- (b) apakah pihak Kementerian bercadang menawarkan perkhidmatan internet mampu milik mudah alih kepada rakyat yang kurang berkemampuan terutamanya di kawasan luar bandar.

JAWAPAN

Tuan Yang Dipertua,

Untuk makluman Ahli Yang Berhormat, Kerajaan melalui Suruhanjaya Komunikasi dan Multimedia Malaysia (SKMM) telah mengambil beberapa inisiatif dalam menghasilkan Pelan Jalinan Digital Negara (JENDELA), sebuah rancangan yang dapat menangani isu akses kepada Internet berkualiti bagi perkhidmatan tetap dan mudah alih.

Antara inisiatif untuk menambahbaik infrastruktur digital di Bintulu melalui Pelan Jalinan Digital Negara (JENDELA) di bawah Fasa 1 setakat 30 September 2021 adalah seperti berikut:

Inisiatif	Tapak Menara Baharu		Naik Taraf Stesen Pemancar		Premis Tersedia Gentian Optik		Jalur Lebar Satelit	
	Perancangan	Siap	Perancangan	Siap	Perancangan	Siap	Pelaksanaan	Siap
Bintulu	45	14	317	226	4,129	5,473	10	-

Secara umumnya, pelaksanaan kesemua inisiatif JENDELA ini telah bermula sejak bulan September 2020 dan inisiatif yang dalam perancangan akan siap secara berperingkat sehingga penghujung tahun 2022. Manakala, bagi perkhidmatan jalur lebar menggunakan teknologi satelit kini dalam proses pelaksanaan dan dijangka akan siap secara berperingkat bermula November 2021 sehingga awal tahun 2022.

Manakala peratusan liputan 4G di kawasan berpenduduk di Bintulu telah meningkat kepada 82.52% pada suku kedua 2021 berbanding 72.34% sebelum pelaksanaan JENDELA pada suku kedua 2020. Selain itu, usaha penambahbaikan rangkaian akan diteruskan untuk memberikan kualiti pengalaman yang lebih baik kepada pengguna.

Para pengguna disaran melayari portal *JENDELA Map* (<https://jendela.my>) yang telah dilancarkan pada Julai lepas, bagi melaporkan lokasi yang kurang mendapat liputan agar boleh dimasukkan ke dalam perancangan masa hadapan. Maklumat yang diperoleh daripada pengguna secara terus secara sumber khalayak atau *crowdsourcing*, dapat digunakan sebagai maklumat bagi membuat perancangan penambahbahbaikan liputan dan kualiti perkhidmatan jalur lebar dari semasa ke semasa.

Kesemua inisiatif ini memerlukan kerjasama serta tindakan beberapa pihak berkepentingan lain terutamanya pihak Kerajaan Negeri. MCMC akan terus bekerjasama dengan agensi kerajaan negeri iaitu Sarawak Multimedia Authority (SMA) bagi menambahbaik liputan dan kualiti jalur lebar di Sarawak untuk mengenalpasti keperluan dan menyelaraskan inisiatif jalur lebar di negeri Sarawak bagi mengelakkan pertindihan lokasi pelaksanaan.

Pihak Kerajaan juga sedang di dalam proses untuk menutup rangkaian 3G agar spektrum yang digunakan dapat digunakan untuk meningkatkan kecekapan perkhidmatan teknologi 4G yang dapat menyediakan kelajuan capaian internet yang lebih tinggi. Sehingga 30 September 2021, sebanyak 1.2 juta pelanggan 3G sedia ada telah beralih kepada 4G dan 78,000 rangkaian 3G telah ditutup untuk menambahbaik liputan dan kualiti perkhidmatan teknologi 4G.

Tuan Yang Dipertua,

Untuk makluman Ahli Yang Berhormat juga, pihak SKMM sentiasa memantau pakej dan harga yang ditawarkan kepada pengguna bagi memastikan pengguna dapat menikmati Internet pada harga yang berpatutan.

Pakej asas jalur lebar mudah alih prabayar ditawarkan pada harga RM10 manakala harga pakej asas jalur lebar mudah alih pascabayar ditawarkan pada harga RM8. Secara umumnya, pengguna boleh menikmati perkhidmatan jalur lebar mudah alih dengan harga serendah **27 sen sehari**.

Selain itu, di bawah Pakej Rangsangan Ekonomi Prihatin Rakyat (PRIHATIN) dan Pakej Perlindungan Rakyat dan Pemulihan Ekonomi (PEMULIH), pembekal perkhidmatan mudah alih utama juga menawarkan internet secara percuma sebanyak 1GB setiap hari (bersamaan 30GB data percuma setiap bulan) bermula dari 1 April 2020 sehingga akhir tahun 2021. Penggunaan data percuma 1GB ini boleh digunakan untuk aktiviti produktiviti dan khusus untuk tujuan pengajaran dan pembelajaran dalam talian.

Sejajar dengan penggunaan data yang semakin meluas, selain pakej asas, kebanyakan syarikat telekomunikasi mudah alih utama juga telah mula menawarkan pakej data tanpa had untuk pelan prabayar pada harga serendah RM30 sebulan mulai Jun 2020, bersamaan RM1 sehari. Selain itu, Digi juga menawarkan pakej khas data kepada belia berumur 12 sehingga 24 tahun yang melanggan pakej prabayar, pada harga RM30 sebulan untuk 15GB data kelajuan tinggi. Selain itu, baru-baru ini, Pakej Remaja Keluarga Malaysia dilancarkan di mana golongan remaja dan pelajar berusia 12-21 tahun boleh mendapatkan pakej prabayar data 20GB pada harga RM30 untuk 90 hari (RM10/bulan) dari 15 Oktober 2021 sehingga 15 April 2022.

Bagi perkhidmatan jalur lebar tetap berkelajuan tinggi, terdapat syarikat penyedia perkhidmatan yang menawarkan pakej asas 30Mbps pada harga RM80 sebulan. Bagi kawasan yang tidak ada liputan jalur lebar tetap berkelajuan tinggi, Telekom Malaysia (TM) menawarkan pakej *Broadband Lite Package* pada harga RM38 dengan data sebanyak 50GB, selain pakej-pakej yang lain. Memandangkan sasaran pakej jalur lebar talian tetap adalah kepada penggunaan isi rumah dan dengan mengambil kira laporan Jabatan Perangkaan Malaysia bahawa purata isi rumah untuk tahun 2019 adalah seramai 4 orang, ini bermaksud harga jalur lebar talian tetap untuk setiap pengguna isi rumah adalah serendah **32 sen sehari**.

Jelas, terdapat pelbagai pilihan yang ditawarkan mengikut keperluan dan tahap kemampuan pengguna iaitu melalui jalur lebar tetap, jalur lebar mudah alih dan jalur lebar tetap tanpa wayar.

SOALAN NO : 40

Berdasarkan laporan Kesatuan Telekomunikasi Antarabangsa (ITU), Malaysia menduduki tempat ke-3 di rantau ASEAN selepas Singapura dan Brunei untuk pakej-pakej mudah alih berikut:

- Pakej asas data dan panggilan mudah alih;
- Pakej asas panggilan dan SMS mudah alih; dan
- Pakej asas jalur lebar mudah alih data sahaja.

Begitu juga bagi pakej asas jalur lebar talian tetap berkelajuan tinggi, Malaysia menduduki tempat ke-3 di rantau ASEAN selepas Singapura dan Brunei. Berdasarkan laporan The Economist pula, Indeks Inklusif Internet 2021, pakej asas jalur lebar talian tetap, Malaysia menduduki tempat ke-3 di rantau ASEAN selepas Vietnam dan Singapura.